


# LUKUNWA WA PUSANAKO

 Nanengezha kibaba kicheche bufuku buno, nangwa kya kutanga kyaipipa, Nkambo inge waswa, pakuuba mba kitupe mutwe wakyo, kufuma mu Mateyo Wazhila 13:24 kufika pa 30. Kabiji ne apo Na—Nasaka kutanga kufuma pa 36 kufika pa 40, mu tubimye tucheche. Pano Mateyo Wazhila, kyapitala kya bu 13, kabiji kutatwila pa veeleshi wabu 24 wa kyapitala kya bu 13 wa Mateyo Wazhila. Telekai bulongo kutangilo ya Kyambo. Byami byambo bikankakalwa, pakuuba Byaji kechi bikankakalwa ne.

*Kabiji wibelele ne kishimpi kikwabo, amba, Abo bufumu bwa mwiulu bwapashang'anya pamo nobe muntu wakushile nkunwa yawama mu bujimi bwanji:*

*Kabiji bantu byo balajile, mulwanyi wanji waishile wakushilemo bincha mu wichi, kabiji wafumineko.*

*Kabiji lubula byo lwakomene, ne kupanga bipangwa, ponkapo ne seku nayo yalupukile.*

*Ponkapo bakalume ba mwina nzubo baishile ne kumwaambila mba, Mwane, kechi anweba mwakushile nkunwa yawama mu bujimi bwenu nenyi? pakuuba ino seku yafuma pi?*

*Kabiji aye wibaambile mba, Mulwanyi ye wauba bibye. Kabiji ba kalume ba mwambijile mba, Mwasaka anweba mba tuye . . . tukebisekulemonyi?*

*Kumwa aye mba, Ine; kuchina mba, pa kusekulamo seku, anweba mwakayokwela kumo ne wichi.*

*Aki bilekai byonse bikomene pamo poso pa kukanowa: kabiji mukimye kya kunowa Amiwa popo nkatuma bakunowa, Patanshi mubungizhe pamo seku, ne kwibikuta bikuta ne kwibisoka: pakuuba mubungizhe wichi ne kulonga mubutala.*

<sup>2</sup> Bushe mwajikumona, “Mubungizhe seku patanshi, ne kwibikuta bikuta”? Pano, pa kutanga bibye, pajingapo kintu kimo kyenye kyaishile kwi amiwa kimye kyo Naikele peulu ya Mitumba ya Catalina bufuku bukwabo, mu milombelo. Kabiji popo Nalangulukile mba, “Kweepi ko Nakonsha kufumya kyambo akyo kyo Nakonsha kwingijisha pa kikye kyo Mbena kukeba kwaambapo bufuku buno?”

<sup>3</sup> Kabiji Naile ne kutana kyambo kya *wapusanako*, nanchi Njina buuku ulumbulula byambo kabiji namwene kyambo *wapusanako* byo kyalumbulula. Kabiji kyalumbulula ke “kubyala lupusano,” nangwa—nangwa, “kwikala wapusanako,” nobe byaamba Webster, “kubyala lupusano, kintu kya

pusanako,” nangwa, “kwikala wapusanako na kyokya kijiko kala.” Nanchi Najikulanguluka, kishina bufuku buno, Nekitela mba: *Lukunwa Wa Pusanako*. Kabiji naketekela mba aye Nkambo usa kupesha Kyambo Kyanji byo ketufwenye kwipi Neakyo.

<sup>4</sup> Kabiji ne atweba twayuka Aye byo alumbulwile, mu veeleshi 36 kabiji—kabiji kufika ne ku 43, awe lunkunwa byo akomene. Kabiji byo tukiji pa kikye, twayai tutange ne kyokyo nakyo, veeleshi 36 bino kufika ne ku 43.

*Kabiji Yesu byo atumine mabuumba mba afumeko, Aye wakatwelele mu nzubo: kabiji ne baana ba bwanga baishile kwi aye, ne kwaamba mba, Tubuulai kishimpi kya seku ya mubujimi.*

*Kabiji Aye wakumbwile ne kwi bambila mba, Aye wabyajile lukunwa wawama ye Mwaana muntu;*

*Kabiji bujimi ke ntanda; kunwa yawama ke baana ba bufumu; pakuuba seku ke baana ba aye mubi;*

*Aye mulwanyi wibikushilemo ye diabola; ne kunowa ke mpelo ya ntanda; kabiji ba kunowa ke bamalaika.*

*Byonka seku byo beikuta bikuta ne kusokwa mu mujilo; nanchi byo byo kikekala ne kumpelo ya ntanda.*

*Aye Mwaana muntu ukatuma bamalaika banji, bakebipwizha pamo bintu byonse bya mu bufumu bwanji bya kwituntulako, ne bonse boba byatama;*

*Kabiji ukebataya mu mujilo, mukisha kya mujilo: kabiji mo mukekala kujila, nangwa kutama miteto kabiji ne kwisuma kumeno.*

*Ponkapo baoloka bakasama nobe juba mu bufumu bwa Shabo. Uji na matwi . . . mulekai omvwe.*

<sup>5</sup> Ao ke Yesu ubena kupana kilumbululo kya kishimpi, Ayemwine, onkao mambo nanchi twayuka mo kya lumbulwilwa. Kabiji pano twaiya ku kikye, kya kubyala kunwa ne—ne kunowa, pano Aye wi kilumbulula. Kabiji Naketekela mba Yesu waambilenga akye kishimpi mu kimye Kyanji, bino wikitazhizhenga kubiwa mu kimye kya ku mpelo ya ntanda, nangwa, ku mpelo ya nkulo, ayo ke *jino* juba. Kabiji Naketekela akye kinshina bufuku buno kyafikilamo bingi mu kino kimye kyo tubena kwikalamo, mambo Yesu waambishatu papo amba “kubungizha kukekalako mu kimye kya kumpelo ya ino ntanda,” apo po pakekala mpelo; kubungizha kwa wichi, kabiji ne kubungizha kwa seku ne kwibisoka, kabiji ne kubiika wichi mu Bufumu. Kabiji Naketekela kyajinga bibye.

<sup>6</sup> Kabiji Kinembelo kikwabo kyatwala mu kuketekela bibye, Nanemba papo, ke Mateyo 24:24, apo po kyaamba mba, kwambapo pa—pa lukunwa—lukunwa wapusanako. Yesu waambile mba abo babiji bakekala peepi pepi kyakuuba mba

bakonsha kujimbaika Basalululwa inge kya konsheka kubiwa. Peepitu nobe pamo.

7 Patu pakwbo mu Kinembelo apo po kyanembwa, kuuba mba mvula unokela pa baoloka ne pa babi.

8 Navuluka kimye kyami kitanshi kya kwiya mukachi ka bantu ba ki Pentekosito. Najinga ku Mishawaka, Indiana. Kabiji Najinga ku mbung'eno ikatampe, bukata bwa kinshimikwa nobe kino, ako bena Kabeta kabuyeke ne baku Kabeta ka bulenge basambankejile pamo. Mambo mu oa moba, mwajinga misalululo, bakumejile kokwa. Abo bambaji ibiji ikatampe ya balongo ba ki Pentekosito. Amiwa kechi ne bomvwinepo nangwa kwi bakumanyapo kala ne. Mu kimye kitanshi kyo Naumvwinepo kwaamba mujimi. Kabiji kumpelo ya kyongo, kya mbung'eno. . . Amiwa byo nabujile kwikala membala mukachi kaabo, Najingatu musapwishi mwanjike wa ku Baptist, Naikela ku kipona kya kunyuma. Kabiji Navuluka kimye kitanshi kyo Naumvwine uji yense kwaamba na jimi, kechi Nayukile byo—byo kikala ne. Kabiji abo banabalume babiji, kyosetu, baikelenga kulutwe, umo waamba najimi kabiji mukwabo wa tutulula byaamba mukwabo. Kyawama, Natatwiletu kutanga bingi Baibolo wami monka Monakonsha kubila, apo ipo, kabiji natana kuuba mba ke Kyanembwa. Abyo kine akyo Kinembelo, Mupashi Wazhila byo akonsha kuuba.

9 Kyawama, peepi nobe juba jimo palutwe. . . Abwa bufuku muchima wami wajinga wabushiwa bingi. Nalajiletu mu bujimi bwa mataba. Amiwa kechi najinga na mali avula a ku—a ku—a ku keba mwanya ne, nanchi Najingatu na mali ankufikizha ku nzubo, kabiji Napotele tu bashinkwa, twapitapo juba jimo, nangwa tubashinkwa twalepuluka, twajinga, kabiji twa kanjo kakwiaula. Kabiji batambulwiji mba Nakonsha kuja nabo, bino kechi Najinga na mali akubikapo ne. Mu oa moba, kyajinga kimye kya kubwela bukomo panshi, 1933, nanchi kyajinga—kyajinga kyakosa binngi. Kabiji nanchi Nalangulukile mba, “Kyawama, Amiwa . . . Amiwa kechi saka kuja nabo, bino Nasaka kuyuka kyo banji nakyu. Baji nakitu kimo kyo Nabula.”

10 Nanchi alwa lukeelo Najinga. . . bangipwizhe, “Bonse bamingilo pitai mwiye ku pulatifomu kabiji ne kwi lumbulula anweba bene, kana yobe ng'anyi, ne kowafuma.”

11 Kyawama, Na—Naambiletu mba, “William Branham, musapwishi, Jeffersonville,” naikala pakipona. Kyawama, pa kyokya kimye Najinga wakepesha musapwishi pa pulatifomu. Kabiji jalondejilepo bangichile kupulatifomu amba ng'ambe. Kabiji byo Nasapwiji, kika, twajinga na kimye kyawama, kabiji ponkapo Natatwile kukumanya bantu bapusanapusana kungita ku bipwilo byabo. Pano panyuma ya . . .

12 Panyuma ya kyokyo, kika, Nalangulukile, “Inge Nakonsha kutanwa paji babo beene banabalume babiji bajikwamba mujimi ne kulumbulula!” Akya kyapilenga mu muchima wami,

Nekikebelenga bingi. Kyawama, nobe byonka byo Nemubula ku ntendekelo, ka kya bupe kacheche ko mundoosa. Mwayukatu, bya bupe ne bya lwito bikala ne pa kubula lulapilo, muji nabyo mu bumi bwenu bonse, monai, musemwatu nabyo, inge bya bupe bya kwa Lesa. Nanchi Amiwa kimye kyonse, nsakijitu kamwaana kalukeke, kimye kyonse kyamwekelanga, bantu banyuka mu mubumi bwami bonse, bayuka amba akyo kya kine. Kyawama, inge Nalanguluka . . . Amiwa kechi ne kiyukile pakyokya kimye ne, kabiji ne kwikitela mba kimwesho, Amiwa kechi nayukile ne kana kyajinga kika. Bino Nalangulukile mba, “Inge Nakonshatu kwisaamba nabo!” Kyawama, kabiji awa mupashi wajinga mu kibaamba waumvwananyikilenga nobe kine Mupashi wa Lesa.

<sup>13</sup> Nanchi Na—Nafwainwa kwisambapo naumo, kabiji Namwipwizhe mepuzho acheche, kabiji wajinga Mwinakilishitu wa kine. Kechi kwajingapo ne luzhinauko pa kyokyo ne, awa muntu wajinga waitabila kine. Kabiji mukwabo walondejilepo, byo Nesambilenga nanji, inge Nakikumenyepo kafutufutu, awa wajinga umo wa mwiabo. Awa muntu kine wajinga . . . Mukazhaji wajinga mwanamukazhi wamutwe-wachiluluka, kabiji wajinga na baana kwi . . . baana babiji kufuma ku mwanamukazhi wamutwe-wafituluka. Kabiji Nalangulukile mba, “Kyawama, pano kika? Bino byo kiji, Amiwa—Amiwa navundankanako. Amiwa naimenatu pa bya nembwa; kyafwainwa kwikala Kyambo, inge ne kechi ikyo ne. Kabiji pano paji awa Mupashi, umo waambishatu, mwaila byonse byo Nayuka, kyabukine; kabiji mukwabo kechi wajinga wawama ne; kabiji Mupashi kuponena pa bonse babiji. Pano, akyo kyakonsha kwikala byeepi?” Nakonsha, kya nkumiishe.

<sup>14</sup> Myaka ibiji palutwe, Nalombelenga mu lukelo ko Nayanga na kulomba. Mwajinga lukungu mu lukelo, kabiji juba jimo mabaanga Nalupukile, na bikile Baibolo wami pa mwandalo, kabiji mwela wa Munshikwile ku mutwala pa Bahebelu, kyapitala kya bu 6. Akyo kyaamba, amba mu moba akumpelo, kyakonsha kwikala byepi umvwe twapona ku Bukine kabiji ne kwibusha atweba bene kululapilo jibiji, kechi kwakishala kitapisho kikwabo kya ubi ne, pano ngaamiba ne bisonsonya, abyo biji kwipi nakusulwa, mpelo yabyo ke kusokwa; pakuuba mvula inokela panopatanda, kimye kyonse, kumutekezha, ne kumenesha biji mumushiji; pakuuba miba ne bisonsonya ke bya kusulwa, bino wichi aye ukabungizhiwa. Kabiji Nalangulukile mba, “Kyawama, mweela wamupupijile ne kumuzhikula.” Kyawama, Natujiletu Baibolo pashi ne jikwabo. Kabiji Nalangulukile mba, “Kyawama, pano nsaku . . .” Kabiji mweela wayishile ne Kumuzhikula. Akya kyamwekele jisatu. Kabiji Nalangulukile mba, “Kyawama, pano, akye ke kyenyi.”

<sup>15</sup> Kabiji nanchi Naimene, kabiji Nalangulukile namba, “Nkambo, kika Anweba kyo mwanshikwila Baibolo pakuuba

mba amiwa ntange kyokyo, Amiwa . . . byo Nafikile ku kyokyo, kyakuba mba ‘miba ne bisonsonya, abyo biji kwipi na kusulwa, mpelo yabyo ke kusokwa?’” Nalangulukile mba, “Kika, Anweba kya kuzhikwila Baibolo?” Kabiji byo natajilenga . . .

<sup>16</sup> Pano, abye bimwesho bya kine kwakubula ne kukanjikizha ne. Awe ke Lesa. Mwamona? Natajile kabiji Namwene kyaalo kibena kuzhookoloka kulutwe yami, kabiji Neyimwene yonse iji pa selechi. Kwajinga muntu wavwajile kitoka, wailenga na kubyala wichi. Kabiji byo ailenga na kuzhookoloka kyaalo kyonse; kunyuma kwaishile muntu, wamwekelenga bibi, wavwajile kifita, kabiji wakushilenga kunwa ya seku konse konse. Bonse bibiji bya komejiletu pamo. Kabiji byo byaubile, byonse bibiji byaumijilwe, mambo mvula wakebewenga. Kabiji byonse bibiji bya mwekele nobe bya lombelenga, na kamutwe ka kacheche kakunamine, “Nkambo, tumai mvula, tumai mvula.” Kabiji makumbi akatampe afijile, kabiji ne mvula wanokejile pa bonse babiji. Byo yanokele, kawichi ka kacheche katolokejile mwiulu ne kwaamba mba, “Nkambo Atotwe! Nkambo Atotwe!” Kabiji ne kaluseku ka kacheche nanko katolokejile mwiulu kulubaji lumo, ne kwaamba mba, “Nkambo Atotwe! Nkambo Atotwe!”

<sup>17</sup> Kabiji ne kimwesho kya lumbulwilwe: Aye mvula unokela pa baoloka ne pa babi. Aye Mupashi umo wakonsha kwitulukila pa babena kupwila bantu, kabiji muntu yense wakonsha ne kusangalala: bakafutufutu, Benakilishitu, kabiji ne byonsetu. Abye kine ibyo. Pano kyookika? Ku bipangwa byabo ba kayukanyikwa. Mwamona? Ajo jojoka jishinda ja kuyukanyikwamo.

<sup>18</sup> Pano mwamona kyokyo, byo kiji bipangwa bya mungye, nangwa wichi wamungye ne jipeke kimye kimo kipashang’anya kintu kituntulu, lukunwa wa bantu, ujitu peepi kyakuuba mba bakonsha kujimbaika bonka Basalululwa. Naketekela mba tubena kwikala mu nkulo yaesakanatu bulongo, apo abye bintu po byafwainwa kusapwilwapo ne kwambiwapo.

<sup>19</sup> Monai mu veeleshi 41, abo babiji ne abo bakekala peepi pepi, peepi pepi mu moba akupelako poso Aye kechi wakonsha kuuba . . . Aye kuuba waketekela kipwilo kimo pakuba mba mwi babanye, nobe, ba Methodist nangwa ba Baptist, nangwa ba Pentekosito, pakuba mba mwi babanye. Aye waambile mba, “Ukatuma ba malaika Banji mu kwibabanya.” Aye malaika ye ukaleta lwabano, lwabano pakachi ka uji bulongo ne watama. Kabiji kapaji wakonsha kuuba byobyoyo ne kanatu aye Malaika wa Nkambo. Aye Ye ukabulang’ana uji bulongo wepi kabiji ne watama wepi. Lesa waambile mba Aye ukatuma ba malaika Banji mu bimye byakumpelo. Kechi bamalaika baji *mumwe*, pakuuba ba malaika mu kimye kya kumpelo, kabiji bobakabuungizha pamo. Twayuka mba akwe ke kimye kya kunowa kubena kwiya. Pano, *malaika* ke kintu kyalumbululwa

amba ke “muluwe.” Kabiji mwamona mba kuji ba malaika batanu na babiji ba mu bipwilo bitanu na bibiji, kabiji pano. . . ine, kupita mu mankulo abipwilo.

<sup>20</sup> Monai bo Aambijile mba bakubyala bobanyi, kabiji ne lukunwa ne aye ye ng’anyi. Kitanshi, wa kubyala wajinga Aye, Mwaana wa kwa Lesa, Ao waille na kubyala Kunwa. Kabiji mulwanyai waishile panyuma Yanji, ao wajinga diabola, kabiji wa byajile lukunwa wapusanako, panyuma ya kubyalwa kwa Lukunwa walumbuluka. Bino, batemwe, akyo kya ubiwe mu mankulo onse kufumatu ku ntendekelo ya ntanda. Kine. Kufumatu ku ntendekelo, kyatatwile mu musango umotu.

<sup>21</sup> Pakuuba Aye waambile mba, “Aye Lukunwa wa Lesa, kyo Kyambo kya Lesa.” Yesu waambile mba, patu pamo, amba “Akyo Kyambo ke Lukunwa.” Kabiji lukunwa yense ukasemununa wamumusango wanji. Kabiji pano umvwe Mwinakilishitu, baana bakwa Lesa, baana ba mu Bumfumu bobaikala ke Lukunwa wa Lesa, nanchi bafwainwa kwikala ke Kyambo kya Lesa, Kyambo kya kwa Lesa kyamwekele munkulo yo baikalamo, kwikala ke Lukunwa walailwa muyoya nkulo. Lesa wapaine Kyambo Kyanji ku ntendekelo, kabiji kila nkulo yajinga na Lukunwa wayo, kimye kyayo, ne milaye yayo.

<sup>22</sup> Pano, Nowa byo aishile kutanwako, kabiji wajinga Lukunwa wakwa Lesa, kyo Kyambo kya Lesa kya mu yoya nkulo.

<sup>23</sup> Kimye kyaishile Mosesa, aye kechi waishile na mbila ya Nowa ne, inge kechi kya konshekele kwingila ne, mambo aye wajinga Lukunwa wa Lesa mu kyokya kimye.

<sup>24</sup> Nanchi Kilishitu byo aishile, Aye kechi waishile na nkulo ya kwa Nowa nangwatu ya kwa Mosesa ne; kyajinga mukimye Kyanji, mambo kisungu ukemita ne kusema Mwaana wamulume, kabiji mba Aye ukekala ke Mesiyasa.

<sup>25</sup> Pano, twaikala kupita mu nkulo ya kwa Luther, nkulo yakwa Wesley (nkulo ya ba Methodist), kupita monse mu mankulo, kabiji ne nkulo ya ba Pentekosito, kabiji kila nkulo ya pewa mulaye wa Kyambo. Kabiji bantu ba muyoya nkulo, aba basolola Kyambo kyalailwe, ye Lukunwa wayoya nkulo, mwayila byaambile Yesu papo, “Abo ke baana ba mu Bumfumu.” Abyo ibyo. Akwa kumweka kwa kwingila kwa Mupashi Wazhila kupichila mu baana Banji aba ke ba Lukunwa wa mu Bumfumu bwa yoya nkulo.

<sup>26</sup> Monai, seku yajinga iyo, bo balwanyai, Satana, awo ubyala lwabano, nangwa mba aye—nangwa mba aye ye lukunwa wapusanako, aye wajinga wazhatwa na mambo a kuba kikye kintu kyatama. Satana wabyajile lukunwa wanji kufumatu kuntendekelo, kimye Lesa kyo abikile kunowa Kwanji kutanshi kwa mutundu wabantu panopantanda. Adama, nangwa byonka byo, saka akyangye kuyuka mba kuji—kuji maana abukine,

kabiji ne akuyuka byawama ne byatama, kabiji kechi wakifikile ku kyokyo ne.

<sup>27</sup> Bino twatana kuuba mba, Lesa wapaine ku baana Banji Kyambo Kyanji amba bo Bukikizhi bwabo. Pakyokyo. . . Kechi tujipo na Bukikizhi bukwapo bwakila pa Kyambo kya Lesa ne. Abo bo Bukikizhi bwetu. Kechi kujipo ma mbomba, kafwako binshimikwa mwakwikala ne, kafwako mampuzha mwakufyama ne, kafwako Arizona nangwa California ne, nangwa kuji konse ne; kujitu Bukikizhi bumo bo tuji nabo, kabiji abo ke Kyambo. Kabiji Kyambo kya alukile ke muntu ne kwikala waikale muno mwetu, ao ye Yesu Kilishitu. Aye ye yekatu Bukikizhi bwetu. Kwikala mwi Aye, twibamutende.

<sup>28</sup> Nangwatu bubi kechi butelwa waitabila wakine ne. Bushe mwayuka kyokyo nyi? Aye wasemwa kwi Lesa, kechi ulenga mambo ne, aye kuuba walenga mambo ne. Mwamona? Kechi utelwabo nangwa pachechetu ne. Kika, Davida waambile mba, “Watokwa muntu awa ye bakabula kutelela mambo kwi Lesa.” Umvwe uji mwi Kilishitu, kechi ujipo na kilaka kya kuuba bubi ne. “Awa mupopweshi, umvwe bamutoksha, kechi ujipo na milanguluko ya bubi ne,” kechi mujipo nayo ne. Pano, ku ntanda, wakonsha kwikala mubi; bino, kwi Lesa, kechi byo uji ne, mambo uji mwi Kilishitu. Wakonsha kwikala byepi ndengamambo saka uji Muyewa wabula bubi, kabiji Lesa umonakotu Aye Yeka mo uji?

<sup>29</sup> Pano akye ke kimye kya kunowa. Kuntendekelo, Lesa byo abyajile Lukunwa Wanji panopantanda ne Kumupana mu michima ya baana Banji, kisemi Kyanji, kulama akya Kyambo, abwa bo bwajingatu bukikizhi bwabo, kulama akya Kyambo! Awe wiya mulwanyi ne konauna akya kimiko, kupichila mu kubyala lukunwa wapusanako, wapusana na Kyambo kya kwa Lesa. Umvwe akya kyajinga kyapusanako ku ntendekelo, kikijitu ne pano. Kintu kyonse kikanungako kiji kyonse ku Kyambo kya Lesa, kikijitu lukunwa wapusanako! Amiwa kechi nasakamana ko kibena kufuma ne, inge kibena kufuma mukabungwe, inge kibena kufuma kunsulo ya mazhita, nangwa inge kibena kufuma kubulume bwa bumulwila ntanda, kintu kiji kyonse kyapusanako na Kyambo kya Lesa, ke lukunwa wapusanako.

<sup>30</sup> Umvwe muntu waimana ne kwaamba mba aye ke musapwishi wa Mamboawama, kabiji waamba mba “moba abya bulume apita,” awo ke lukunwa wapusanako. Umvwe muntu waimana ne kwaamba mba aye wamwingilo, kafunga wa kipwilo kuntu kumo, kabiji aye kechii waketekela mba Yesu Kilishitu ye umotu mu kulondakana mu byonse (kufumyakotu mubiji wamashi), umotu keesha, leelo, ne myaka yonse, awo ke lukunwa wapusanako. Umvwe waamba mba “byabulume ne nkulo ya butunwa byapita,” awa ke lukunwa wapusanako. Umvwe baamba mba, “Kechi kujipo kintu kya kuuba mba

lubuko lwa Bulesa,” awa ke lukunwa wapusanako. Kabiji ne Ntanda yayulatu nabyo. Byo byavulamo ne kumutabankana wichi.

<sup>31</sup> Twamona mba mutanshi wa byajile lukunwa wapusanako watelelwe mba “diabola,” kabiji twayuka mba byo kyajinga, mu Ntendekelo 1. Pano twatana kuuba mba, kabiji monka muno mu—mu Buuku wa Mateyo, kyapitala kya bu 13, Yesu ukitelatu kyonse kyapusanako na Kyambo Kyanji amba “ye diabola.” Kabiji muno mu 1956, uji yense byyala wapusanako, kyapusanako na Kyambo kya Lesa kyanembwa, nangwa ubikako ndumbulwilo yanzi ku Kikye, ke lukunwa wapusanako. Lesa kechi ukekinemeka ne. Aye kechi wakonsha ne. Kuba byamvwangakana ne. Kechi kine kikobiwa ne. Kijitu pamo nobe jipeke ja masitandi; kechi kikamvwangakana na kintu kiji kyonse ne, kuuba wamvwangakanya bumi bwaji ne, kwafwainwa kwikala kintu kituntulu. Lukunwa wapusanako!

<sup>32</sup> Pano twatana kuuba mba, kimye Lesa kyo abyajile Lukunwa Wanji mu bujimi bwa Edena, twatana mba mwafumine Abela. Pakuuba kimye Satana kyo abyajile lukunwa wanji wapusanako, mwafumine Kaina. Umo waletele awa moloke; mukwabo waletele awa wabula koloka. Mambo Eva watelekele ku kyambo kyapusanako, kyapusanako na Kyambo kya Lesa, kabiji kyatatwile musango wabubi kuya kulutwe kufumatu ponka pa, kabiji bwatwajijilatu kuya kufika ne pano. Kabiji kechi tubebufumyamo ne kanatu bamalaika bakeye na kwikyabanya, kabiji Lesa utwala baana Banji ku Bumfumu, kabiji ne seku ikasokwa. Monai pa bibye binchi bibiji.

<sup>33</sup> Inge twajingatu nakimye kyabaya pa lulwe lufunjisho, bino ke ku kwatatu pabiine binshina binshina, nanchi twafwaunwa kuya mukulumbela ba misongo mukimye kicheche kibena kulondelapo.

<sup>34</sup> Monai, kunwa yabo yakomejiletu kyapamo nobe byonka Lesa byoaambile mumwe mu kyapitala 13, kya mukishina kyetu bufuku buno, kya Mateyo, “Balekai bakomene pamo.” Pano, Kaina waile ku ntanda ya Nondi, ko akamwenejile aye mwine mwanamukazhi, ne kusongola wasongwele; kabiji Abela waipayilwe, kabiji Lesa waletele Seta mu kupingakena pe aye. Kabiji ne bisemi byatatwile kuya kulutwe, pakachi ka kyawama ne kyatama. Pano, twamona mba babungakeene pamo, umu umu mwiabo, pakimye pakimye, kabiji Lesa wa . . . Kyafikile pa bubupisho bwabaya posotu Lesa wi kyonawine.

<sup>35</sup> Bino mukupezhako yonse kunwa ibiji yalupukile, lukunwa wapusanako ne Lukunwa wa Lesa, ne kubika pamo mitwe yabo ituntulu, kabiji ne yoyo yayishile mwi Yudasa Isakalota ne mwi Yesu Kilishitu. Mambo, Aye wajinga Lukunwa wa Lesa, Aye wajinga ntendekelo ya kulengwa kwa Lesa, Aye kechi wajinga mushi ya Lesa ne. Kabiji Yudasa Isakalyota wasemekelwe mwaana walonaiko, wafumine ku ngehena, ne



kubwela wabwelele ku ngehena. Yesu Kilishitu wajinga Mwaana wa kwa Lesa, Kyambo kya Lesa kyasololwa. Yudasa Isakalyota, mu kupusanako kwanji, wajinga lukunwa wa diabola, waishile pantanada, na kujimbaika; byonka byo ajinga ku ntendekelo, Kaina, aye shanji mutanshi.

<sup>36</sup> Yudasa wakailengatu kipwilo. Aye kechi wajinga wakinshika ne. Aye kine kechi wajinga na lwitabilo ne; aye inge kechi wamupoteshe Yesu ne. Bino, monai, aye wabyajile awa lukunwa wapusanako. Aye wamwene nobe wakonsha kwikala na bulunda nantanda, nsabo, kabiji ne kwikala na bulunda ne Yesu, bino kyajinga kimye kyapwa kya kuuba mba obepo kintu kimo. Kimye kya lufu byo kyaishile, byo aubile kikyete kintu kiyatama, aye wapitajile pa mulaini wa lwabano pakachi kakuya kulutwe ne kubwela kunyuma. Aye wailengatu kulutwe monka mujishinda jo ailengamo, ja bujimbijimbi. Aye wabyajile lukunwa wapusanako, wakebele mba obilwepo bibusa kutotwa tubungwe tukatampe twa joja juba, na ba Faliseo ne ba Saduseya. Kabiji wamwene nobe wakonsha kwilengela mali aye mwine, ne kwikala wayukanyikwa ku bantu. Inge akyo kechi kyakonsha kulengela bantu bavula kutwela mu kyo kyo kyapusanako, kweseka kutalwa bulongo ku bantu! Twayai tatalwe bulongo kumeso akwa Lesa, kechi ku muntu ne. Bino abyo Yudasa byo byo aubile kimye akye kyapusanako po kyaikela bumutwe mwi aye.

<sup>37</sup> Kabiji twayuka mba Yesu wajinga Kyambo, Yoano Wazhila 1, waamba mba, “Mutendekelo mwajinga Kyambo, kabiji akya Kyambo kyajinga na Lesa, kabiji akya Kyambo kyajinga Lesa. Kabiji akya Kyambo kya alwilwe ke muntu ne kwikala waikela muno mwetu.” Nanchi, Kyambo ke Lukunwa, nanchi awa Lukunwa waalukile ke muntu kabiji waikela muno mwetu.

<sup>38</sup> Inge Yudasa wajinga lukunwa wa mulwany kabiji ke wapusanako, ne aye naye waalukile ke muntu ne kwikala muno mwetu mu bumuntu bwa kwa Yudasa Isakalyota. Aye kechi wajingapo na lwakine, lwine lwitabilo ne. Aye wajinga na *kyo alangulukilenga* mba lo lwitabilo. Kuji ne kya kuuba mba kwikala na lwitabilo; kabiji ne lwitabilo lwa kitabila-mbijinga.

<sup>39</sup> Kabiji lwitabilo lwakine lwa Lesa luketekela mwi Lesa, kabiji Lesa ke Kyambo, kafwako nangwa kimo kya kunungako kwi Akyo ne. Aye Baibolo witubula mba umvwe twanungako kyambo kimo, nangwa kufumyako Kyambo kino, lubaji lwetu lukafumishiwamo mu Buuku wa Bumi, Lumwekesho 22:18, kyapitala kya kupezhako.

<sup>40</sup> Muntendekelo patanshi, Buuku mutanshi wa Baibolo, Lesa wibambijile mba kechi bakonsha kulalapo Kyambo kimo kya Kyokyo ne, “Kyambo kyonse kyafwainwa kulamwa,” bafwainwa kwikela ku Kyambo. Yesu, pakachi ka Buuku, waishile ne kwaamba kyokyo mu nkulo Yanji, kabiji waambile mba, “Muntu kechi ukekela ku kanjo kokatu ne, kana ku Kyambo kyonse

akya—akya kifuma mukanwa kakwa Lesa.” Kabiji mu nkulo ya kupezhako ya Lumwekesho, witubujile atweba, amba, “Yense ukafumyako Kyambo kimo ku Buuku, nangwatu kunungako kyambo kimo kwi Akyo, lubaji lwaji lukafumishiwamo mu Buuku wa Bumi.”

<sup>41</sup> Onko mambo kechi kwakonsha kwikalapo kivule ne, kanatu kituntulu, Kyambo kya Lesa kyabulwa kumvwangiwamo! Abo bo baana babalume ba Lesa, baana babakazhi ba Lesa, abo basemekwa kechi kukyasa muchima wa muntu ne, nangwa kupichila mu kwi imuna maboko ne, nangwa musango wa lubatizhilo ne; pakuuba basemwa mu Mupashi wa Lesa, kupichila mu Mupashi Wazhila, kabiji ne Kyambo saka kimwesa Akyokine kupichila mwiabo. Awo ye Lukunwa wakine wa Lesa!

<sup>42</sup> Aye mulwanyi utwela mu kipwilo ne kwikala ba kinkila mumafunjisho abantu nangwa kintu kimo. Pakuuba abyo kechi . . . Akyo ke kyapusanako, kintu kiji kyonse kilwang’ana na ndoonda ya Bukine bwa Kyambo kya Lesa.

<sup>43</sup> Kabiji twayuka byeepi? Twaamba mba, “Kyawama, abo, banji na luusa lwa Kwikilumbulula nyi?” Ine, mwane! Kapaji muntu uji na luusa lwa kulumbulula Kyambo kya Lesa. Aye Ye Mwine ulumbulula. Aye wikilaya, nachi Aye wikyuba, ako ko kulumbululwa kwaakyo. Aye Byo Ekilaile, nanchi Aye Wikifikizha, ako ko kulumbululwa Kwakyo. Kintu kyonse kyabula kuyila mumo na Kyambo kya Lesa ke kyapusanako! Kinetu!

<sup>44</sup> Pano, monka mo Naambila, Yudasa kechi wajinga na lwitabilo lwine ne. Wajinga na lwitabilo lwakitabila-mbijinga. Aye wajinga na—na lwitabilo alo loalangulukilenga mba awa wajiga Mwaana Lesa, bino aye kechi wayukile mba awa wajinga Mwaana wa Lesa ne. Aye umvwe kechi wikyubile ne. Kabiji muntu awo ukanekenya pakikye Kyambo kya Lesa kwikala ke Bukine, aye uji na lwitabilo lwa bukitabila-mbijinga. Kalume wa Lesa wakine ukakwachichijila ku kyokya Kyambo.

<sup>45</sup> Mafuku apitapo acheche kunyuma, wamwingilo umo, waku Arizona, wa ku mukatampe, sukuulu wayabingi kuwa mu uno muzhi, waishile kwi amiwa ne kwaamba mba, “Na—Nasaka ku kolola pakintu kimo” (Naambile mba . . .) “inge waikala na kimye.”

Naambile mba, “Kino kyo kimye kyawama kyo Nayuka. Iya kuno.”

<sup>46</sup> Kabiji nanchi waishile konji, aye waambile mba, “Mr. Branham, ubena kweseka . . . Naketekela namba wiwakishika kabiji wiwa bulamo bujimbijimbi, pakuuba obewa ubena kukeba kuleta ku ntanda Lufunjisho lwa batumwa.” Kabiji waambile mba, “Aya nkulo ya batumwa yapwilo na batumwa.”

47 Naambile mba, “Kintu kitanshi kyo Nasaka kukwipuzha, mulongo wami, bushe waketekela mba Kyambo kyonse kya Lesa kyashingwa maanyi?”

Aye waambile mba, “Ee, mwane, Amiwa kine naitaba.”

48 Naambile mba, “Nanchi, mwakonsha nkumweshwa mu Kyambo apo nkulo ya batumwa po yapwile? Pano, mweshai po kiji, Amiwa kanketekela pamo ne anweba.” Kabiji Naambile mba, “Aye munembeshi wa batumwa, awa wajinga na bakii ba Bumfumu, pajuba ja Pentekositi kimye nkulo ya batumwa po yatampile, abo baambile mba, ‘Batemwe ne balongo, tube byepi pakuuba mba tupuluke?’ Aye waambile mba, ‘Lapilai, anweba bonse, ne kubatizhiwa mu Jizhina ja Yesu Kilishitu, mu lulekelo lwa mambo enu, kabiji mukatambula wa bupetu Mupashi Wazhila, mambo mulaye walayilwe anweba ne baana benu, ne bonse baji kwalepa, ne bonse mo bavujila bobaketa kwi Nkambo Lesa wetu.’ Pano, Kyambo kyakonsha kwipachika byepi Akyokine?”

Awa muntu waambile mba, “Njina mashika atama bingi.”

Naambile mba, “Naketekela byo byo, ne amiwa.” Mwamona?

49 Pano mbulai, bushe Lesa wakitwajijilatu na kwita nyi? Inge Lesa wakitwajijila na kwita, nishi nkulo ya batumwa kechi yapwa ne. Kine! Bonse mo bavujila Nkambo Lesa wetu bo aketa, bo aketa, bo aketa, bonse mo bavujila Aye bo aketa, yikatwajijilatu kwikala nkulo ya bantumwa, mambo Yesu Kilishitu ujitu pamo keesha, leelo, ne myaka yonse.

50 Bino, twatana leelo amba akye kyapusanako kya byalwa kupita mu mankulo onse. Inge kya konsheka kutwela mu kishina teeni nangwatu mamineti fiftiini, Nakonsha kwikyuba, bino obewa kechi wakonsha ne. Kupita mu mankulo. . . Atweba bonse, atweba bavula tutanga Baibolo. Kabiji pano nobe Yesu byo ayishile, ne Aye wataine akya kyapusanako, kyatala mungi. Aye wajinga Kyambo kyasololwa, Aye wajinga kulumbulula kwa Lesa kwa Kyambo, mambo Aye waambile mba, “Kebakebai mu Binembelo, mambo mwi Abyo mo mulanguluka mba mo mo tumwena Bumi Bwaape, nanchi ibyo bibenakunshimuna Amiwa.” Abyo byo byo kiji. Aye—Aye wajinga kulumbululwa kwa Kyambo. Kabiji yense mwaana wamukazhi ne wamulume wakwa Lesa wasemwa-jibiji mu ino nkulo ke kulumbululwa kwa Kyambo. Mwi makalata anembwa, atangwa kubantu bonse. Ee.

51 Monai, Aye waambile mba, “Byatu byo Bampopwela, byo bafunjisha byapusanako na Lufujisho. Byatu byo Bampopwela, byo bafunjisha Lufunjisho lwapusanako, lufunjisho lwa bantu, mikambizho ya bantu, kufunjisha bibye amba Kyambo kya Lesa, saka kyabulapo nangwa kintu kimo kya mu Kyambo kya Lesa.”

52 Talai, yonse nkulo ya lupwilenga kijimwa kyamusango yekao, yonse nkulo yajinga nakyoy, kabiji ne yetu kechi yashalapo

ne. Tuji na kintu kimo, kabiji ke nkulo ikatampe mookiji kukila mankulo onse akwabo kwi abika pamo, mambo aye ke mpelo yajishimikila ja ntanda. Akye ke kyapusanako kikatampe akyo kyabula kwikalapo panopantanda, kiji pantanda leelo jino. Kyapusanako mu mankulo akwabo kibafumishe ku Lesa mumi ne wakine, kwibatwala ku tulubi. Leelo, Yesu waambile mba mu Mateyo 24:24 kikekalatu peepi pepi, amba kya konshe kujimbaika bonka Basalululwa inge kya konsheka kubiwa. Aambai pa wapusanako! Oo, wajimuka bingi. Satana uji mukachi ka bantu, kabiji nobe yewa wafunda amasukuulu a byambo bya lesa, nobe Dokotala wa bya Bulesa, wakonsha kufunjisha akya Kyambo bulongotu. Yesu waambile byo. Bino mumonai, kujipo kuntu kumo. Waambile mba, “Kyawama, pano, akyo kechi kyajinga kya kikye ne.” Oo, ee, byokiji, ne akyo, monai, mambo Lesa waambile mba byokiji.

<sup>53</sup> Monai byo kyaubile. Abya byapusanako byaletele bukaji bwa kwa Lesa mu moba akwa Nowa, kimye Lesa kyo atumine ngauzhi Wanji kabiji wasapwijile nobe mujilo ubena kuteema, wakambizhe lulapilo ku bantu, ne wapusanako walobele na meema. Pano Satana waubile byepi? wayishile panyuma, mwi Hama, ne kutatula kubyala jibiji. Abyo kine ibyo.

<sup>54</sup> Kwayishile Mosesa, awa ngauzhi mukatampe, nekuleeta baana ba Isalela mu mungyetu. Kika kya mwekele? Mosesa, awa ngauzhi mukatampe wa kwa Lesa, na kwibaletela Bukine bwapwijijika, Bukine bwashiniikishiwa. Aye wakumenye Lesa. Lesa washiniikishe mba wamukumanya Aye. Pano ngaabo bantu kunyuma akwa, aba mapulisiti, kabiji bajinga na bumpopweshi bwabo, bisho byabo, ne bisela byabo kabiji ne byosetu, bino Mosesa waimene nobe ke kishiniikisho kyakulumbulula Kyambo. Kulubako kyokyo ne! Mosesa wajinga kulumbulula kwa mulaye Wanji. Aye waambile mba ukekyuba; aye wajinga kilumbululo kya Lesa.

<sup>55</sup> Kika kyamwekele? Kipwilo po kyatatwiletu kufuma mu Ijipita, kweenda moba achechetu apichilepo, pano kika kyamwekele? Satana wayishile na kyapusanako kyanji mu muntu, Kaina wabubiji, ao wajinga Balamu, kabiji wabyajile wapusanako mukachi ka bantu. Twayuka mba abyo ibyo. Awa Balamu, lufunjisho lwa kwa Balamu, amba “atweba bonse tujitu pamo, twingijilatu Lesa umo yeka ye mwingijila,” mwailatu ndoonda, aye wajingatu bulongo, mambo aye wapaine kitapisho akyo Lesa kyo apaine; mikoko ilume sebeni, bang’ombe balume sebeni pa byakusokelapo bitapisho sebeni, kabiji walombele bulongotu kwi Lesa umotu byonka Mosesa byo alombele momwa mungye, byonse byajingatu pamo. Bino kechi bajingatu pamo ne! Byatongwejlenga jimo kwi atweba bintu bikeya kufikizhiwa. Kwajinga, ne jikwabo, Kaina wamwekele mu...yuwe muntu wa bu Balamu. Kabiji Lesa wamwekele mu muntu wa bu Mosesa, kulumbulula Byambo Byanji kupichila mu muntu, kwi

mweshwa Ayemwine, mulaye Wanji, kupichila mu muntu. Kabiji wapusanako wamwekele.

<sup>56</sup> Nanchi byo byo kyaubiwe mu kimye kyakwa Yudasa, wayishile na wanji wapusanako.

<sup>57</sup> Kabiji, vulukai, abwe bubi aba bantu bobaketekejile, amba “atweba bone tujitu pamo, tumpopwelatu Lesa umo, atweba bonse twafwainwa kwikalatu ba mukupwilo kimo, twafwainwa kwikala bantu bamotu,” abwa bubi kechi ba mulekejilebo Isalela ne! Yesu waambile, Ayemwine, “Bonse bafwa!”

<sup>58</sup> Bonse baonaikile, bonse kufumyakotu basatu. Aba bobonka ba kwachijile ne kuketekela mulaye. Banekena byo baambilenga mba, “Atweba kuuba twatambula ntanda ne, kabiji kyakila kwitukosela,” ne bikwabotu, Kaleba ne Yoshiwa wazhindamikile bantu, ne kwaamba mba, “Atweba twakonsha kwi itambula, mambo Lesa wikilayile kwi atweba! Amiwa kechi nasakamana ne nangwa bulwanyi bubaye byepi!”

<sup>59</sup> Kabiji twakonsha kusapwila lubuko lwa Bulesa, ne lubatizhilo lwa Mupashi Wazhila, kabiji ne kwikala na bulume bwaakwa Lesa bwa kwitwabanya kufuma kubintu bya panopantanda. Lesa ye waambile byo byo! Aya nkulo ya batumwa kechi yapwile ne, kabiji kechi ikapwa ne, ikayangatu.

<sup>60</sup> Nanchi, twamona musango umo wakubyala byapusanako. Kabiji vulukai, abwa bubi kechi bwalekejilwe ne. Pano, mulongo, inge kechi kyalekejilwe mu kyokya kimye ne, pano ngaluno apo—apo lukunwa wa mankulo onse ubena kuletwa pamo?

<sup>61</sup> Monai kikye kintu kikatampe kyo aubile Balamu, kyatwajijiletu, kabiji pakupezhako kyayishile mwi—mwi Yudasa Isakalyota, ne Yesu. Kyajinga kika? Yudasa ne Yesu bajingatu kipasha kyakwa Kaina ne Abela. Mambo, byonka Yudasa byo ajinga mumpopweshi, ne Kaina naye wajinga mumpopweshi. Kaina wanshimikile kya kusokelapo bitapisho, ne kulenga kitapisho, wampopwejile Lesa, aye wajingatu wakinshika mukikye byonka byajingatu mukwabo. Bino, mwamona, aye kechi wajinga na lumwekesho lwa mwaila Kyambo ne. Aye walangulukile mba Adama ne Eva bajile ma apozi nangwa kipangwa kikwabo. Kabiji Kaina... Abela, kupichila mulumwekesho, wayukile mba kyatama; kyajinga mashi ebalupwilemo, kabiji aye walambwile mwaanamukoko. Kabiji Lesa wanshimwine mba mulambo wanji wajinga wawama. Nanchi kyamuletejile kichima kabiji waesekele kwipaya mulongo waji. Kabiji byo aipaile mulongo wanji pa kyakusokelapo kitapisho kimo kyonka pafwijile mulambo wanji, mwaanamukoko wafwijile pa kitapisho, nanchi ne Yudasa Isakalyota byo apoteshe Yesu Kilishitu ponka pa kyakusokelapo bitapisho kyakwa Lesa, ne ku Mwipaya nobe byonka Kaina byo aipaile Abela. Mambo, Kaina wajinga lukunwa wapusanako.

<sup>62</sup> Kabiji ne Balamu byobyoye ajinga, ngauzhi ye batewile na mali, muntu wafwajilwe kuyuka bulongo. Kabiji Lesa wamujimwine kupichila mu biyukilo ne mu byakukumya, kabiji ne mbongolo waambile munjimi ingi, nangwa byonkabyo watwajijiletu nakuya musango umotu. Aye wasemekelwe kwikala wa—wa kubyala wapusanako.

<sup>63</sup> Kabiji umvwe Yesu waambijile jimo amba ino nkulo ikapelako na kupusanako kwabaya bingi ako kukyanye kwikalako, nkulo ya kipwilo kya Laodikeya, kyambazhi, akyo kyamulengejile Aye kwikala pangye ya kipwilo, kyakonsha kwikala kintu kingi byepi kanatu kyonka akyo: Wapusanako! Kinetu, byo kiji. Kyapwila mu yoya nkulo.

Kabiji kyajinga Kaina ne Abela pa Kalvali.

<sup>64</sup> Pano monai, nobe kimye kyonse, aku Yesu uyatu, wayile Mwiulu, Mupashi Wazhila watuminwe. Awa wajinga Lukunwa, Upana-Bumi ku Kyambo, byonka byo twaambile bufuku bwapita. Aye Iye usangulula Kyambo. *Kusangulula* kyalumbulula mba “kubwezha ku Bumi.” Aye Mupashi Wazhila wakine ubwezhatu ku Bumi akya Kyambo kya mu musango Wakyo. Kuuba kyabwezha mikambizho ya bantu ku Bumi ne, Kuuba kya ubiwa ne, mambo Akyo kechi kiji mu musango wa mikambizho ya bantu ne. Ke Bumi bwa Kyambo kya Lesa, mambo Akyo ke Lesa. Mwamona? Kabiji Kisangulula awa Mubiji.

<sup>65</sup> Pano monai, byo baubile. Nanchi, kabiji ne Baibolo waamba mba, ne—ne Yoano waambile kubaabo baana ne kwaamba mba, “Anweba twaanatwami, mwaumwine mba antikilishitu ukeya panopantanda,” waambile mba, “ao waiya kala panopantanda, kabiji ubena kwingila mu baana ba milengulwila.” Pano, akyo kyajinga peepi nobe myaka saate kufuma payishijile Mupashi Wazhila. Twatana mba, umvwe Mupashi Wazhila waiya, aye Lukunwa wakine, wakine Upana-Bumi ku Lukunwa, nanchi waiya jibiji awa wapusanako. Kabiji monai, kyatwajijiletu kuya. Kyajinga na . . .

<sup>66</sup> Akyo kine Kyambo kya shiniikishiwa kala, abo bangauzhi bakala bashiniikishe Kyambo kya Lesa amba kya Bukine byo bayilenga kulutwe. Umvwe muntu uji yense watanga *Kinje kya Nikeya*, nangwa *Kinje-kyakunyuma ya Nikeya*, aamoba fiftiini amashi abumulwila ntanda, kimye aja jibumba ja bena Loma po bakebelenga kuletamo kabiji ne kulengamo dinominesheni mukipwilo. Bangauzhi bayishile, bepombela ne mumwaiwa mukoko, na kujatu mizhazhi, kabiji baimene na kyokya Kyambo! Bino kyaubile byepi? Kyafwayijilwe kwikala nobe Kaina, kyafwayijilwe kwikala nobe Abela, umo wafwile. Kyakine, byo kyaubile. Kabiji Kyambo kyataile bongozhi Bwakyo mukachi kabantu, kabiji basalulwile kufumyapo Kyambo kyakine ne kupingakenyamo mafunjisho apusanako a kipwilo kitanshi kya ba Katolika. Abo babikileko papa,

babikako ne mbishopu, babikileko *kikye, akya, ne kyokya*. Abo bafumishepo kilumbululo kyakine kya jizhina ja Petelo, kabiji ne—ne—ne pe Maliya, kabiji—kabiji ne byonse byashala; ne kulengamo tulubi, kabiji balengele ne kusekelela kwa buntushi kufuma mu kyo-batela mba bumpopweshi bwa Kinakilishitu. Kyajinga kika? Lukunwa wapusanako! Kabiji ne kulengamo kabungwe, kulengamo kabungwe, kimyetu kitanshi pantanda, ke kipwilo. Kyajinga kika? Awa lukunwa wapusanako watatwile ku byaala, kunungako kintu kimo, ne kufumyako.

<sup>67</sup> Ing'anyi waumvwinepo, mu Baibolo, kubula kuja nyama pa Kitano? Ing'anyi waumvwinepo, mu Baibolo, kintu kya kusansa meema mukifulo kya kubatizha, kwibizha? Ing'anyi waumvwinepo abye bintu, “Ujibyepi, Maliya” nangwa kintu kimo? Ing'anyi waumvwapo bibye bintu bimo byabola bya babo ma Polotesitati, ne abyo? Mwipika kuuba watela ketulu mba wauba manyi ne. Kyawama! Nobe, kuzhatwatu mukacheche ke kuzhatwa mu byonse! Ing'anyi waumvwinepo Lesa ke engile na kabuungwe? Mweshaipo kimye kimo apo kimo kya alwilwe ke kabuungwe kabiji kyatwajijila kwikala na bumi. Ponkapotu bafwile, kabiji kechi baimenepo jibiji ne! Ke kimye kyakuuba mba kintu kimo kimweke, ke kimye kya Lesa kuuba mba ende. Kyaonawine boongozhi mukachi ka bantu.

<sup>68</sup> Kintutu kimo kyaubiwa ne buleelo. Abo bonauna boongozhi, amba, “Oo, aja jibuumba ja booba kyongo-kyazhila, kafwako kyobaji nakyo ne.” Kabiji, kika, ke kyapusanako! Kumanyai Kyambo kilungi na kilungi ne kumona byo Kiji, mumone inge Lesa wakonsha kulumbulula Kyambo Kyaji Ayemwine. Lesa wakonsha kwalula ao mabwe ke baana bakwa Abulahama. Amena.

<sup>69</sup> Akya Kyambo kya shiniikishiwa bulongo kala kupichila mu Benakilishitu batanshi, Lesa byo ebapokolwele mu bintu byonse, ne misongo, kabiji bajinga na bangauzhi, kabiji baambile ne na njimi, ne kulumbulula, kabiji ne kupana byambo byaitabizhiwe amba kine bya bukine kimye kyonse. Bino nangwa kwajinga bukamonyi bwa kushiniikisha Kyambo, bantu basajile Kwikifumyapo, ne kusaluluko dinominesheni. Awa ye inaja tubuungwe tonse.

<sup>70</sup> Byonse bibiji pano byankoma byapela. Batatwile kubyaala kunwa jibiji. Kyafwile, bino kyasapukile jibiji mu moba akwa Luther, byonka byo twayuka kufuma ku mbila itanshi kuno pa kimye kya kanjo ka kwiaula. Kyasapukile mukimye kyakwa Luther. Pano baubile byepi? Ponkapotu awa muntu mukatampe byo afwile, balengelemo kabuungwe.

<sup>71</sup> Kyasapukile. Kabiji ne jikwabo mu moba akwa John Wesley, kimye abo ba Anglican, na bya bukikizhi bwabo bwapeenape kabiji byonsetu byaishiletu mukintu kimo akyo kya kukumbana peepi nobe ntanda yonse, kabiji kika kyamwekele? Lesa wayimenye muntu wajizhina ja John Wesley, ne koonaua

byonsetu. Kabiji byo afwiletu, aye ne Asbury ne bakwabo, kika kyamwekele? Balengelemo kabuungwe, kabiji pano muji na misango yonse ya yaba Methodist. Kulutwe kwayishile umo nangwa mukwabo, Alexander Campbell, John Smith, kabiji ne bikwabotu-byavula.

<sup>72</sup> Kupezhako, kwayishile ba Pentekositi, kufuma mu byonse bye. Kika kyamwekele nanchi? Banyemenetu bulongo, kika kibakanyishe? Mwabwelele kunyuma monka mumateshi momwafumine, kubwelatu jibiji monka mu mateelo, babwelele ku wapusanako kabiji ne kulengamo tubuungwe, mwanekenene mu Kyambo. Kabiji kimye kyonse Lesa kyo akatuma kintu kipya, kuuba mwikitambula ne. Abyo ibyo! Wapusanako ne jikwabo! Kabiji, monai, byonka byo Naambile juba jikwabo, anka kamusele katanshi kalupukile kufuma kuyuwe muzhazhi, kyayiya ku mabula kabiji kufikatu ne ku mulenge, kabiji kyabwela ke kasalala jibiji, ne kulupukamo. Anka kajikuzhi kakacheche kamwekatu pamo nobe jipeke jiine, kabiji twaketekela mba kyajinga, pakuuba umvwe mwikinshikula, kechi mujipo jipeke mukachi ne. Akyo kipanatu ngovu pakuuba mba jipeke jinkomenemo, kabiji ne kufwa kifwa, kabiji ne bumi bulupukamo mwi akyo ne kuya mu jipeke. Monai, nanchi beta bipwilo abya bya byaajile. . .

<sup>73</sup> Twatana kuuba mba leelo byo-tutongola amba bipwilo byetu, ne kuba Pentekosito pamo, twayile, kechi twatondelwe ne, twalengele mabumba etu ateba bene. Byonse byayishile, twafwaijilwe kwikala na *bibye*, twafwaijilwe kwikala na *bibye*, twafwaijilwe kwikala na jibumba jikwabo. Kabiji awe mulunda waimene, waambile mba, “Aye ukeya pa jikumbi jitoka.” Mukwabo waamba mba, “Uu-uu, Aye ukeya pa mbili utoka.” “Kijitu bulongo, tusakulenga mabumba abiji.” Monai, kyo kika? Kembyajilo ya kyapusanako! Umvwe Aye waiya, monse mo kyafwainwa kwikela, Aye ukalumbulula Kyambo Kyanji Ayemwine byo Akeya. Twayai tupembelele poso kyonka kya kimye. Kwatakanyai ki. . . Kwaambapo pa kyokyo, kechi mwakonsha kutambula ne Mbila ya jojo juba ne. Kimye kyonse kujitu kutongola Lesa byo akoba, nangwa byo Auba, kabiji ne kusula byo Abena kuuba. Ajo joshindatu jo tutambwilamo byapusanako mu kikye.

<sup>74</sup> Pano twamona kuuba mba leelo bipwilo byetu, byonse—byonse bipwilo byetu bya byaala kulubesha, kabiji ne kunowamo kazhimbiji. Kechi tujipo na pwijilo ya milombelo ne, kechi tujipo na kupwilo ko twayikalanga nako ne. Lukatazho lujipi? Twaswishatu bintu byonse. Talai, ne ku bipwilo byetu bya Kipentekosito, mwaiikala banabakazhi baji nasuki-yakwichika. Abyo kechi byaswishiwenga ne. Baji na bilungi byo bapeta, kuvwala ngala yakupeta, ne byonsetu; tolai mwanamulume kuno uji na. . .nobe Rickys ne bintutu bikwabo; basongola jisatu nangwa bimye foolo, kabiji ma dikoni; oo, nga kupusanako kika!



Ke busaaajitu! Bushe bekyuba byepi? Lesa kuba waikala nakyo mu Kipwilo Kyaji ne, bafwainwa kuya ku kabuungwe pakuuba mba batwele mo. Muntu uji na moyo pakuba mba ambepo kintu kimo pakikye, mambo bakonsha kwibapangamo ma kabuungwe. Lesa, tupai banabalume babulwa kukwatakanako na kintu kikwabo ne kanatu Lesa ne Kyambo Kyaji, abo bakalondolola Bukine pa kikye. Abyo ibyo byo tubena kukeba. Twauba kika? Ba byaala kyapusanako. Twa byaala ku lubesha, kabiji pano tubena kunowatu kazhimbiji.

<sup>75</sup> Monai pano babena kubungizhiwa pamo amba bisokwe. Bushe mwamona, Yesu waambile mba, “Patanshi, bibungizhai pamo, mubikuta, ne kubika bikuta byonse pamo, kabiji ne Amiwa kebisoka.” Kuji kikuta kya kicheche kitelwa mba Methodist, Baptist, Presbyterian, Lutheran, babena kubungizhiwa pamo mu Kinje kya Bipwilo kya Ntanda yonse. Kyokika? “Babungizhai pamo patanshi!” Aleluya! Bushe mwamona? Aye patanshi wabungizha seku, wibifumya ku wichi, ne kwibyabanya: “Bibungizhai pamo ne kwi bisoka.” Bonse bakasokwa na buchibishi bwa mambo bwakwa Lesa, mambo akubyaala wapusanako mu bantu, bintu byo bo... Kwikala na musango wa bwina lesa, bino sababena kukana Bulume bwao, kukana Kyambo, ne kulamichilatu kukisho kya bumpopweshi, kya bimo bya mafunjisho abantu abyo muntu umo byo atwezhamo, kweseka kubika mu Kyambo kya Lesa. Kuba kyaingila ne. Ke wapusanako.

<sup>76</sup> Nabijika leelo, byonka byo kyajinga, awa ngauzhi mukatampe wakala, Amosi, byo ayishile muyewa muzhi, waambile mba, “Amiwa kechi ne ngauzhi ne, nangwa mwaana wa ngauzhi ne. Bino umvwe bonkwe wabuluma, ng’anyi usakubula kuchina?” Aye waambile mba, “Umvwe Lesa waamba, ng’anyi wakonsha kukana kwaula?” Aye wikizhachishe akya kisemi, waambile mba, “Awa yeka Lesa ye mwaamba mba ye twingijila ye ukemonauna.”

<sup>77</sup> Anweba bikai kikye, kiji patepu, kabiji vulukai. Awa yeka Lesa ye... Abo bantu pakino kimye babena kubungizha akwe kunowa kukatampe kwa—kwa Kinje kya Bipwilo kya Ntanda yonse, kabiji anweba mubena kuya na kutwelamo. Kuuba mwaikala pangye yakyo ne. Anweba mwakonsha kufumamo nobe pabunke bwenu, nangwa ne mubena kutwelamo. Kechi kujipo kushala pakachi kwakubula kwikala kulubaji lumo ne. Ke kiyukilo kya lukinyama. Kafwako muntu kupota nangwa kupotolola ne, kanatu yeka uji na kiyukilo, nangwa uji na wapusanako. Bino, kutwelamo ne! Lupukaimo mwi akyo! Kinyemai! Fumaiko kwi ankyo! Awa yeka Lesa ye baamba mba ye twingijila ye ukebasoka. Awa Lesa mukatampe wabutemwe kechi...

Waambile mba, “Kyawama, Yesu walombelo amba atweba bonse twafwainwa kwikalatu umo.”

<sup>78</sup> Kabiji Aye waambile mba, “Mwakonsha kwendela pamo byepi, babiji bendele pamo byepi, kana baswang’ana?” Aye waambile mba “umo,” nobe Aye ne Bashaji byobaji Umo. Kabiji Bashaji bajinga Kyambo, kabiji Aye wajinga kumweeka kwa Kyambo. Aye wajinga “Umo” ne Bashaji, mambo Aye wajinga kumwekanyika kwa Kyambo kyakwa Lesa kyalailwe. Kabiji nanchi byo byokiji ne leelo, nangwa mu jubatu jikwabo. Ee, mwane. Awa Lesa ke Umo. Aye witukeba mba twikale ke umo.

<sup>79</sup> Pano *ngaabo* bekale umo byepi, *awe* ubena kukana kusemekwa kwa kukisungu, kabiji *awe* kechi, ukana lubuko lwa Bulesa, kabiji *akye*, *akya*, bonse baayatu mungi byonkabya? Bamo mwi abo kechi baketekela ne mwi Lesa ne, baketekela mba Aye wajinga Mwaana wakwa Lesa; baketekela mba Aye wajinga mwaana wakwa Yosefwa, *watelwa* mba Mwaana wakwa Lesa. Kyakine. Aye mulongo wabumapasa ku Benaluther, Benazwingli, baketekela kyokyo, amba Aye wajinga kine muntutu wawama. Bena Kilishitu ba Saayasi baamba mba Aye wajingatu ngauzhi, muntutu uji pamo nobe bantu bakwabo, Aye kechi wajinga wa Bulesa ne. Kika, inge Aye kechi wajinga wa Bulesa ne, Aye nishi ke mujimbijimbi mukatampe bingi ao ukyangye kwikalapo pantanda. Aye wajinga Lesa inge ne Aye nishi kafwapo kyoajinga ne. Aye wajinga wa Bulesa! Aye wajinga Lesa, Ayemwine, waalukile ke muntu mukachi ketu, mu muntu wa Mwaana wakwa Lesa. Kyakine, abyo byo Ajinga.

<sup>80</sup> Pano twamona awe wapusanako watwelamo. Twayuka mba uji muno, kafwako wakonsha kwikikana ne. Oo, ami! Pano monai. Aye ukonauna aja jibumba jaamba mba twingijila Lesa. Anweba batalaingu.

<sup>81</sup> Lesa wabyaajile Lukunwa Waji. Ke pezhako, mambo ke kimye kya kutapa laini wamilombelo. Lesa wabyaajile Lukunwa Waji, kabiji Lukunwa Waji ke Kilishitu. Amiwa nkasapwila pakyokyo bufuku bumo katataka, amo Lesa mo afukwile kubika Jizhina Jaji, inge Nkambo waswa, kapepo pakimye kimo kya mpwijilo ya kwiaula inge Naikalako na kakimye kabayako. Talai, Aye jojishindatu Jimo ja kupulukilamo. Aye yeyekatu umo wakine Wabulume bonse. Aye ye Lesa umo wakine, kafwako mukwabo kulubaji Lwaji ne. “Amiwa ne Lesa, kabiji Lesa yekatu bunke,” Aye byo byo aambile. Yesu waambile mba, “Awe ke mukambizho: Umwai, Anweba Isalela, Amiwa ne Nkambo Lesa wenu, umotu Lesa. Amiwa yami Iye. Kika kyo mukebela mukwabo? Mukwabo ukeya... Naiya Mujizhina Ja Bataata, kabiji kechi mwatambulwila Amiwa ne. Pakuuba mukwabo ukeya mujizhina janji ayemwine, kabiji ao ye mukatambulwila.” Kabiji bekyubile ku Nikeya.

“Obe wi Mwinakilishitunyi?”

“Amiwa ne Baptist.”

“Obe wi Mwinakilishitunyi?”

“Amiwa ne Pentekositi.”

“Obe wi Mwinakilishitunyi?”

“Amiwa ne Methodist,” jizhina jikwabo.

<sup>82</sup> Pakuuba inge kyaiya ku joja Jizhina ja “Yesu Kilishitu,” abo bendelatu palepa kufumako kwi Ajo monse mobakonsha kubila, kechi bajipo nakimo kya kuuba Najo ne, mambo Aye ke Kyambo kabiji Kyambo kimweesha Akyokine. Monai, Jishindatu jimo ja kunyemenamo! Aye ye Loozi wa Kushaloni, Baibolo waamba mba Aye byoaji. Kifulo kyonse (mu Baibolo) kya Lesa kyokya kwa Yesu Kilishitu. Aye wajinga Alufa, Omega, Mutanshi ne Wapelako; Aye Wajingako, ye Ujiko, kabiji Ye Ukeya; Muzhazhi ne Kisaka kya Davida, aye byonsetu pamo Muzhazhi ne Kisaka kya Davida; Ntaanda wa Kumakya, Loozi wa Kushaloni, Kikwibu kya Mukipachiko, Alufa, Omega, Taata, Mwaana, Mupashi Wazhila, byonsetu mwi Yesu Kilishitu! Aye wajinga kumweekanyika konse kwa Yehoba Lesa mu mubiji pakuuba mba ekale muno mwetu. Kyakine Aye byo ajinga.

<sup>83</sup> Aye wajinga Loozi wa Kushaloni. Baubile byepi na Loozi wa Kushaloni? Be Kifinine kufumyamo, be Kisansawile, pakuuba mba bafumyemo kanukufyu Mwiakyo. Wawama loozi ba mufinine pakuuba mba bafumyemo kanukufyu mu loozi. Abwa bwajinga Bumi bwawama, kechi kwajingapo bumi bwaikela nobe Bobwa ne, bino Bebufinine pa Kalvary.

<sup>84</sup> Monai, batolele akwa—akwa kushingwa kwa Loozi wa Kushaloni ne kwi kubika pe Aloni, aye washingilwe na kyokya pakuuba mba atwele kumeso a Nkambo amwa mukifulo mwazhila, amwa mu kipembe kyazhila. Aye washingilwe na Loozi wa Kushaloni, pakuuba mba atwele mukachi akasase jitanda ja lusa pamwaka pa mwaka. Kabiji akwa kushingwa kwafwainwa kwikala pe aye, ke bwema bunuka-bulongo kwi Nkambo, saka asenda mashi amwaanamukoko kulutwe yanji, panyuma aye bamusasa kala ku mwaanamukoko. Pomogalaneti ne mangengele kubya kuvwala byanji, aye waendelenga na kutaya tampulo, sabiya na kuvuma “wazhila, wazhila, wazhila kwi Nkambo.”

<sup>85</sup> Monai, Aye ye yewa Loozi wa Kushaloni, abwa Bwema bunuka-bulongo, akwa Kushingwa pa bantu Baji. Anweba kuba mwaiya kumeso Anji na bisho bya bantu ne, nangwatu na kintu kikwabo ne, kanatu kushingwa na Loozi wa Kushaloni, kyo Kyambo. Aye ye Kikwibu kya Mukipachiko.

<sup>86</sup> Pano, mwakonsha kutana byepi muchi? Mutana muchi kana mwatola kikwibu ne kufinamo, po mutanamo muchi. Badokotala bamwingijisha mukukwasha kupiminako. Mwasenda muntu uji na lubazhibazhi nangwa muntu yebalubakanyako, nangwa mwanamukazhi, ubena kumvwa nobe kukeba kukonya, ubena kwenda pathi na kubijika, ubena kusekasekatu, dokotala utola tuheche tumuchi ne kutwezha mu

kuboko kwaji nangwa mu mishipeshipe kuntu kuno, nangwa wanji, kabiji bamuzhindamika. Kipwa pakakimye kacheche. Bino inge awa muchi wapwamotu, byabwela jibiji, kukila ne byo kyajinga patanshi.

<sup>87</sup> Bino Nasaka kwimubula, batemwe, awa kemusangotu wa kipasha kya mwine Muchi ufuma ku Kikwibu kya Mukipachiko ye Nayuka. Aye ye Kikwibu kya Mukipachiko. Aye bamufinine pa Kalvali. Aye wamanyikilwe namambo amizhilulwila yetu, ku bipumo Byanji ko twabukijilwe. Mukyokyo, akwa kufinikanya kufuma mu mumaluba, Aye wajinga Jiluba. Aye wajinga Jiluba jikatampe ajo ja menapo pantanda, jajinga ke kikye Kikwibu kya Mukipachiko, kabiji awe Loozi wa Kushaloni mukatampe. Pano Aye waakobama bufuku buno, pakachi ka Meulu ne ntanda, Naketekela, Aye wajinga pakyokya kimye, nangwa byonka byo, ku—ku fumyapo bubi bwa panopantanda ne kubwezha lubuko pantanda. Kabiji Baibolo waamba mba Aye ye umotu keesha, leelo, ne myaka yonse.

<sup>88</sup> Mulunda, Lesa byo abuujiile Mosesa, mungyetu, akyo kyajinga ke—ke kipasha kya Aye, mu kushikula muloolo wa lubemba. Kabiji lubemba kyaimenako bubi bwapingulwa, aye muloolo waimenako, awa *muloolo walubemba* waimenako “bubi bwapingulwa kala.” Nobe, *lubemba* ke “buchibishi bwa mambo bwa Bulesa,” nobe kyakusokelapo bitapisho apo bitapisho po byabikilwe. Kabiji ne aye Elaija watajile mwiulu ne kwaamba mba jiulu jiji nobe lubemba, buchibishi bwa mambo bwa Bulesa pa kyaalo kyabula luketekelo akyo kyafuma kwi Lesa. Lubemba kyaimenako buchibishi bwa mambo, buchibishi bwa mambo bwa Bulesa. Kabiji muloolo waimenako bubi bwapingulwa kala; kabiji Yesu wajinga awa muloolo wa alulwa ke bundengamambo bwetu, kabiji watolele buchibishi bwa mambo bwa Lesa pe Aye. Aye waashilwe na mambo amizhilulwila yetu, wafumpilwe namambo abubi bwetu, watambwile lukabisho Aye lwa kwituleleta atweba mutende, kabiji mo mubipumo byanji mo twabukilwa.

<sup>89</sup> Oo, Lesa uji shitolo Wanji wayulamo Muchi, bufuku, wenu anweba. Mwinakilishitu mutemwe, wakolwa ne kumanama. Oo, anweba mwakoka, kyaikala kimukosela bingi. Anweba kuuba mwaimana nakyo kutwajijila ne, anweba—anweba mukayatu kiyeye mu ino ntanda yakatataka yo twaikalamo.

<sup>90</sup> Bushe anweba mwajikumvwa *Kipepala Kyabyambo* bufuku buno, byo baamba, amba—amba Russia waamba mba, mu 55, amba bakekalapo “na sambu pa kyaalo kyonse”? Akyo saka kikyanye kumweka, Kusendwa nishi kwafika. Nanchi kiji peepi byepi, mutemwe? Kijitu pano peepi.

<sup>91</sup> Anweba kechi mwakonsha ku Mukeba bufuku buno na muchima wenu yense nenyi? Aye ye Kikwibu kya Mukipachiko, kabiji Aye ujitu pamo keesha, leelo, ne myaka yonse. Aye uji pano bufuku buno mu kwiimika Ayemwine mukachi ka bantu Banji,

nobe byonka Mosesa byo aimikile akya—akya kiyukilo kya bubi, bwapingulwa. Kabiji kechi bubi bonkatu ne, bino ne misongo. Vulukai, Yesu waambile mba, “Byonka Mosesa byo aimikile muloolo wa lubemba, nanchi ne Mwaana wa muntu wafwainwa kwimikwa.” Kika Mosesa kyo ekimikile? Mambo abubi, kubula luketekelo, kabiji ne mambo amisongo. Yesu wabikilwe peulu, ne aye, na mambo a bubi, misongo, kabiji ne kubula luketekelo. Aye wajinga kintu kimo.

<sup>92</sup> Pano, bufuku buno, mu moba apo potuji na wapusanako mukatampe, Yesu Kilishitu walaile mu Luka, amba mu moba akwa . . . Kwiya kwa Nkambo saka kuyangye kwikalako, kiji nobe byonka byokyajinga mu moba a Sodoma, kabiji kimye Mwaana muntu po akesolola Ayemwine, nobe Mwaana muntu byo esolwele Ayemwine kwi Abulahama kookwa; Elohimu, Lesa, waalukile ke muntu mukachi ka bantu, kabiji waikela kookwa ne Abulahama kabiji wamumwesheshe, ne kumubuula bya langulukilenga Sala (waikela kunyuma Yanji) mu tente, ao Ye abula kumonapo. Wamubuujile byo a . . . Kabiji wamutelele jizhina jaji, “Sala.” “Abulahama,” kechi jaji—kechi jaji ja Abulama, aye watatwile na, kana Abulahama. Kechi Sela ne, S-e-l-a; kana S-a-l-a, “Ujipi mukazhobe, Sala?”

Waambile mba, “Uji kunyuma Yenu mutente.”

<sup>93</sup> Waambile mba, “Amiwa nkabwela ko uji pa kimye kyabumi mwakawa.” Kabiji aye wasekele. Aye waambile mba, “Kika kyo akusekela?”

<sup>94</sup> Pano, Yesu waambile mba, “Saka akyangye kubungizhiwa ne kusokwa awe wapusanako mukatampe, amba Mwaana muntu ukemweesha Ayemwine mu musango umotu byonka Aye byo abubile kyokya kimye.” Kabiji akya . . . Kyo kika? Ke kwimikwa, jibiji, kumeso enu, amba Yesu Kilishitu ujitu pamo keesha, leelo, ne myaka yonse. Wikiketekela akonyoni? Twayai tukunyike mitwe yetu tulombe.

<sup>95</sup> Lesa Mutemwe, twi Mutemwa. Kyambo Kyenu ke—ke Kanjo-kakwikuta kwi atweba, Nkambo. Atweba twi Katemwa! Twiikela kwi Anko, Nkambo. Kibena kumweka nobe bipimo byetu kechi bikala bya kumaina ne. Twatemwatu kwikala kutebulu Wenu, konka ku Kyambo Kyenu, ne kumvwa buwame bwa mapesho enu, Nkambo, umvwe twaiya muyuwe musango, balongo ne banyenga abo bapotwa-Namashi ku Mwaana wa Lesa, alo lolupoto lwa Mashi Enu. Kabiji twaiya kuno bufuku buno, Nkambo, twapaana ano mafuku kulombelela bakolwa. Kabiji mwaila Binembelo, Anweba mwaamba mba “kubipumo byenu ko twabukijilwe.” Kechi kyafwainwa kulomba ne nanchi (kyetu kwisololatu bubi bwetu), mambo ko kubipumo Byenu ko (kintu kyapita kunya) twabukijilwe. Oo, ngaajo juba ja lupulukilo! Ngaa—ngaa aye mulaye wakwa Emanwele! Amba Kine ke Bukine.

<sup>96</sup> Anweba mwaambile mba, “Mukakimye kacheche, ba panopantanda kechi ba Nkamona ne, nangwa byonka byo anweba mu Kamona, mambo Amiwa” (ke ng’ambilo ya kutazha kumuntu amba “Amiwa”) “Amiwa kekala ne anweba, ne mwi anweba, kufika ne kumpelo ya ntanda.” Kabiji mukimye kya kya kumpelo, aye mpelo ya bintu ikatampe, Anweba mwaambile mba, saka kikyangye kumweka, kikekalatu nobe mujilo saka akyangye kupona mu Sodoma ne kusoka ntanda ya ba Gentila ne, amba kukeya lumwekesho jibiji lwa Mwaana muntu nobe byonka byo kyajinga mu Sodoma. Taata, abo bantu kechi kibapite ne.

<sup>97</sup> Kabiji Nalomba, Lesa, nobe kintu kicheche kyabula kulumbuluka, (inge Naamba kyatama, ndekelaiko mambo), kutwela mulwendo. Amiwa ne batemwa, Nkambo. Na—Nalomba mba kechi kibapite ne. Lekai buno bwikale ke bufuku bumo bwa mafuku akatampe, Nkambo. Bonse bakolwa, bamanyikwa, bampofu, kyonse byokiji muno, Nkambo, batambule lubuko bufuku buno. Yense ndengamambo atambule lululukilo. Monka mu michima yabo ponka pano, inge kechi baitabila ne, kabiji bakonsha kumwitabila Kilishitu pa kyonka kino kimye. Kiswishai kye, Taata. Byonse biji mu maboko Enu. Twipana atweba bene kwi Anweba, pa kwimumona Anweba kwiya mukachi ketu.

<sup>98</sup> Kabiji Anweba mwaambile mba, mu Yoano Wazhila 14:12, “Aye waitabila mwi Amiwa, mingilo yonguba Amiwa ne anweba mukeyuba.” Byo twayuka mba Anweba mwi yunkishe Anwebabene ku bantu, mambo Anweba mwajinga awa Ngauzhi ye anene Mosesa mba ukamwimika mukachi kenu. Aba kechi bajinga na bangauzhi pa myaka ma aduleedi ne, kyapusanako kyajinga pa kuboko konsetu, bino nangwa byonka byo Kyambo kya Lesa kyafwayijilwe kufikizhiwa; nanchi Kyambo kya alukile ke muntu, kabiji ne wapusanako nanji byo aubile. Kabiji, Taata, twikimona ne jikwabo leelo, wapusanako ubena kwiya pamo ke kikuta kimo kikatampe; kabiji twamona Kyambo ke kiiye mu musango umo. Tupeshai bufuku buno, Taata. Twipana atweba bene kwi Anweba, na Kyambo Kyenu. Kyonse kyo Mwitukebela atweba mba tuube, kyubai ne atweba, Nkambo. Mu Jizhina ja Yesu. Amena.

<sup>99</sup> [Nyenga umo waamba mulunjimi ungi. Kafwapo kiji pa tepu ne—Waku.] Atweba kechi twayuka Aye kyo aambile ne. Aye kape ubena kukeba kwitubulapo kintu kimo, nanchi ikalaitu na munema pa kakimye kacheche. [Kafwapo kiji pa tepu ne. Mulongo umo wapaana kilumbululo.]

<sup>100</sup> Amena. Bushe mwatango nyi. . . ? [Kafwapo kiji pa tepu ne—Waku.] . . Kinembelo apo mulwanyi po abena kwiya, kabiji bonse babuungakene pamo, kabiji ba . . . mulwanyi waji bulume bukatampe bingi. Kabiji ne Mupashi wakwa Lesa waponejile pa muntu, ne kumubuula, kabiji aye waawile, kabiji wamubuujile

kwakuya na kupembelela, kabiji baonawile balwany baabo. Kyabwela kyaiya jibiji. Kuji mpuzha ya konawinapo mulwanyi obe, monai, tolai kuboko kwa Lesa. Kuboko kwa Lesa ke Kilishitu, nangwa byonka byo, Kyambo, nanchi sendai Kyokyo mu michima yenu bufuku buno mu kimye kyo tubena kwita mulaini wa milombelo.

<sup>101</sup> Naketekela namba Billy wajikupana bitupa bya milombelo jibiji leelo. B, B's, twayai tutole B, eite-faivi. Bufuku bwapita, twajinga na fifitiini bufuku bwapita. Tweseka javula kusenda peepi nobe fifitiini bufuku bumo. Kabiji lamai bitupa byenu, tusa kwiatambula, ponka pano. Twayai tweseka peepi nobe fifitiini. Eite-faivi. B, nobe Branham, mwayukatu. B, eite-faivi kufika pa aduleedi. Kabiji tuji. . . Twayai tumone, ing'anyi uji na B, eite-faivi, sutulai kuboko kwenu. Anweba mwanshininwa. . . Oo, kunyuma ko, kijitu bulongo, eite-faivi eeye.

<sup>102</sup> Pano, mwaanami. . . Kape muno mujipo beenyi, abo babula kuyuka kikye byo kyaubilwe. Mwaanami wiya muno, nangwa muntu mukwabo; inge kechi wakonsha kwiya ne, Mulongo Borders, nangwa muntutu mukwabo. Umo mwanamulume wiya, ne kutola bibye bitupa, anji aduleedi, ne kwimana kumeso abantu ne kwi avwangaula pamo. Nanchi aye wimupa kitupa, kechi wakonsha kwi mubuula mba anweba musa kwiya kuno ku pulatifomu, aye kechi uyuka kyokyo ne. Kabiji nangwatu Amiwa kechi ngyuka ne. Ngiyatu bufuku, ne kutola peepi nobe teeni nangwa fifitiini, ponka po pakachi, abya bitupa. Akyo kechi kijipo na kintu kimo kyakuleta lubuko kwi anweba ne. Mwakonsha kwikala ponka po. Talai, bufuku bwapita. Baanga bajinga muno bufuku bwapita, tumone maboko enu? Bantu byo batambwile lubuko bonse mu kimye kya kupwila!

<sup>103</sup> Pano, bajinga eite-faivi, eite-sikisi, eite-sebeni, eite-eiti, eite-naini, naite. Beye bonse pakyoka kino kimye. B, eite-faivi, eite-sikisi, eite-sebeni, eite-eiti, eite-naini, naite. Akyo kyajinga umo. . . Kinetu, tukeba. . . Kabiji inge muntu umo. . . Apo mukwaabo, ee, akyo kyakonsha kubiwa bulongo. Naite, naite kufuka ku aduleedi pano. Naite, naite-wanu, naite-tuu, naite-fiili, naite-foolo, naite-faivi, naite-sikisi, naite-sebeni, naite-eiti, -naini.

<sup>104</sup> Inge kechi mwakonsha kwenda ne, inge muji na. . . Namona tuji na bavulako, basatu ba pabipona byamawilo muno, baji foolo, Naketekela, Nakonsha kumona. Inge muji na kitupa kya milombelo, ayo yo—ayo yo nambala yenu yaitwa, kabiji kuuba mwaenda ne, sutulaiko kuboko kwenu, tusa kwimwendesha kufika kuno.

<sup>105</sup> Kabiji inge kechi munji na kitupa kya milombelo ne, ikalaitu ponka po na kulomba, ne kwaamba mba, "Nkambo Yesu, lekai—lekai—lekai kikale ami bufuku buno." Baanga muno babuula kitupa kya milombelo ne, sutulaiko kuboko kwenu. Oo, ami! Kijitu bulongo, pano twayaitu twambe kikye,

Naketekela kechi yakonsha kumvwanika nobe myendeleko ne. Bino kwajinga mwanamukazhi wachepa mubiji wabujile kwikala nakitupa kya milombelo ne, twakonsha kwaamba. Wayile kupita mu jibuumba, waambile mba (pano telekai bulongo), “Umvwe Nakonsha kukwata kya kuvwala kya yuwe Mwanamulume, Nsakwikalatu bulongo.” Baanga bayuka jishimikila? Kijitu bulongo. Kabiji waubile byepi? Aye wa Mukwachile, kabiji waile na kwikala pashi. Kabiji Yesu waalulukile, Aye wayukile poajinga. Abyo ibyo nyi? Aye wayukile lukatazho lwaji polwajinga. Abyo ibyo nyi? Aye wayukile lukatazho lwaji polwajinga, nanchi Aye wamubujile lukatazho lwaji byolwajinga. Kabiji waumvwine mu mubiji waji amba lukatazho lwa mashi lwaleka. Abyo ibyo nyi? Mambo ka? Aye wa Mukwachile.

<sup>106</sup> Pano, baanga Benakilishitu muno bufuku buno bayuka, mwayila Bahebelu, awa Buuku wa Bahebelu, amba Yesu ponka pano ye Ng’anga Mukatampe, aye Ng’anga Mukatampe umvwa kunekena kwetu? Iye Aye nyi? Kijitu bulongo, inge Aye ye Ng’anga Mukatampe, ofweshi umotu, Ng’anga Mukatampe, Aye wakonsha kuba byepi? Aye wakonsha kuba mu musango umotu mo Aubijile kyokya kimye. Mwaketekela kyokyo nyi? Aye wakonsha kubila monka mo Aubijile kyokya kimye, inge mwakonsha ku ketekela kyokyo. Kijitu bulongo. Baanga baketekela kyokyo, sutulaiko kuboko kwenu, ambayi mba, “Amiwa kine nekiketekela”?

<sup>107</sup> Kijitu bulongo, saka bakyangye kulenga mulaini wamilombelo, twayai twikale na mulaini wa milombelo konka ko. Nayuka mba Aye uji pano. Na—Na—Naumvwa Kyeenyi Kyanji, kabiji Na—Nayuka mba Uji pano. Iyai. Malaini wa milombelo wanengezhiwa? Nakufwainwa kwita konka ko. Mulombetu—mulombetu, talaitu kukwe ne kulomba, ketekelaitu.

<sup>108</sup> Inetu wachepa ka mubiji waikala papo saka abena kuntala, waikala kubwipi na inetu wavwala magalashi. Kechi mwikimona Akyo kyakobama peulu yayewa mwanamukazhi? Talai kukwe. Mwamona? Ukena kumanama na lukatazho lwa muchima. Mwaketekela mba Lesa usa kwimubuka nyi? Inge mwakonsha, sutulaiko kuboko kwenu. Abyo byo biji lukatazho lwenu. Abyo ibyo. Pano umvwe alo lolukatazho lobe, sutulaiko kuboko kwenu pakuuba mba bantu bamone, sutulaiko kuboko kwenu *byobya*. Pano, kechi mukiji nakyoko ne. Lwitabilo lwenu lwi mulengela kubukwa.

<sup>109</sup> Aye ye umotu keesha, leelo, ne myaka yonse. Oo, pajipo kyapusanako; bino Yesu Kilishitu ujitu pamo keesha, leelo, ne myaka yonse. Ke kikyoko. . . Pano twajijilaitu na kulomba, monai, kechi kana mba mwaiya kuno ne, akyo mwafwainwa kwikiyuka.

<sup>110</sup> Pano, awe ke inetu. Monka mo Nayukilatu, kechi Nakimumonapo mubumi bwami ne, ke mwanamukazhitu



waimana papo, kabiji uji nakitupa kya milombelo, kabiji kechi wajikuyuka mba usakwitwa nangwa ine. Muntu umo wakukupatu kitupa kya milombelo, kabiji obewa—yobe nambala yaitwa, nanchi iyatu kuno kulutwe. Abyo ibyo nyi? Kabiji kechi jipo na jishinda ja kuyukilamo byo uji ne, kana yobe yeng’anyi, kwepi ko wafuma, kika kyo ubena kukeba, nangwatu kimo pa kyokyo ne. Amiwa ne muntutu, obewa wi mwanamukazhi. Abyo ibyo. Akye kipikichala kimo kyaishilepo kimye kimo mu Baibolo, Yoano Wazhila, kyapitala kya bu 4.

<sup>111</sup> Pano mwaamba mba, “Waji kuba byepi, Mulongo Branham, apo ponka, kimye kya pitapo?” Nakuyatu kulutwe pacheche, monai. Amiwa kechi nayuka ne, monai. Aye wakonsha kwikyuba. Amiwa kechi nayuka ne. Pano ngaawa mwanamukazhi kokwa? Amiwa kechi na kimumonapo awa mwanamukazhi mu bumi bwami. Aye ke mwenyi mwine mwine kwi amiwa. Naketekela kyajinga mwanamukazhi. Ing’anyi awa muntu waji kubukwa ponka pano mujibumba? Mwakonsha nyi. . . Ee. Twibenyi ku umo ne mukwaabo. Inge abyo ibyo, peepeza kuboko kobe nobe *bibye*. Mwamona? Amiwa kechi nakimonapo awe mwanamukazhi. Bino wajikwikala popa, saka aketekela. Pano, aye wajikukwatapo Kintukimo, kechi ibyo nenyi? Kechi kyakonsha kuletapo kintu kimo kyawama nkukwata amiwa ne.

<sup>112</sup> Bino pano kechi mwakonsha kumona mba Baibolo ke Kyambo kya Lesa kyakine nenyi? Aye ye umotu keesha, leelo, ne myaka yonse. Atweba twaaluka ke matambanako a yewa Mupashi Wazhila ao ye Kilishitu. Mwamona? Awa ye mwine Lukunwa. Nanchi umvwe Mupashi Wazhila wakine waikala mu Lukunwa wakine wa Kyambo, kechi. . . Kechi ukasendapotu lubaji lumo Lwakyoo (mambo, diabolaa naye wingijisha Kyokya), wafwainwa kwi Kisendatu kyonse, monai, kyonse Kyambo Kyakyo; mambo, Aye kechi ye Lesa wakichika ne, Aye ye Lesa mutuntulu. Mwamona? Kabiji akyo byobyo kyubiwa.

<sup>113</sup> Pano, apano paji mwanamukazhi, kechi Nakimumonapo ne. Yesu watainapo mwanamukazhi umo wa muyuwe musango kimye kimo, kape kechi lukatazhotu lumo ne, Amiwa kechi nayuka ne. Kabiji Aye waikele ku mushima. Aye—Aye wafwajilwe kuya ku Samaliya. Kabiji twatana mba, Samaliya wajinga mushi ya katumbatumba. Kabiji—kabiji Aye wailenga ku Yeliko, nangwa byonka byo, kabiji Aye waile kupita ku Samaliya, kabiji waishile ku muzhi wa ku Saika. Kabiji Aye waikele ku mushima, kabiji watumine banababwanga Banji na kukeba kanjo.

<sup>114</sup> Mitundu ya bantu baanga baji pantanda? Isatu. Hama, Shema, ne bantu bakwa Yafeti. Atweba bonse twafumine kwi Nowa. Kabiji byonse byashala panopantanda bya onayikile pa kyokya kimye. Mitundutu yabantu basatu, Muyudeya, Mugentila, ne Mwinasamaliya (ao ujitu pakachi akwe Muyudeya

ne Mugentila). Kabiji ayo yo mitundu ya bantu baji mu ntanda, monai, basatutu.

<sup>115</sup> Byonsetu mwi Lesa bilumbulukila mu bisatu. Nobe bibye bisatu byo Najikwaambangapo bufuku bunu: mitundu isatu ya byapusanako, tampulo isatu pakuba mba Kyambo kyaluke ke muntu, ne byalondelapo. Mwamona?

<sup>116</sup> Pano, kabiji Aye—Aye waambile ku ba Yudeya, wabuujile Filipa, byo amuletele Natanela, aye ko ajinga, ne kwaamba mba, “Namumwene kimye kyo ajinga mushi ya kinchi.” Aye wamubuujile. . . Andeleo byo aletele Petelo, Aye waambile mba, “Jizhina jobe yobe Shimona, kabiji ukatelwa mba ‘Petelo’ kufuma pakino kimye.” Waambile mba, “Yobe mwaana Yona.” Mwamona? Bino, bonse bo bajingatu Bayudeya.

<sup>117</sup> Bino papo Waya ku Gentila . . . kechi mu Gentila ne, pakuuba mwina Samaliya.

<sup>118</sup> Pano ke kimye kya ba Gentila. Aye kechi waubilepo kikye nangwa kimye kimo ku ba Bagentila ne. Kebakebai mu Binembelo. Kafwamo. Bino Aye walayile, mu Luka 22, amba Aye ukeyyuba Kwiya saka kukyangye kufika ne.

<sup>119</sup> Bino Aye wayikele pashi kookwa, kabiji kwaiya Muyudeya wakichika ne mu Gentila, mwanamukazhi. Kabiji Aye wamwambijile mba, “Mwanamukazhi, Ndetelepo bya kutoma.”

<sup>120</sup> Aye waambile mba, “Kika, Obewa kechi wakonsha kungipuzha kyokyo ne, kyamusango yeo. Atweba twi. . . Paji lwabano papo. Obewa wi Muyudeya, kabiji—kabiji Amiwa ne mwina Samaliya.”

<sup>121</sup> Aye waambile mba, “Bino umvwe wajikuyuka Ye ubena kwisambanaji, inge Wangipuzha bya kutoma.” Kika Aye kyoaubilenga? Kukeba kukwatakanya mupashi wanji. Kabiji byo Atulukile lukatazho lwa yewa mwanamukazhi, kyawama, Wamubuujile kuya nakuleta mulume wanji. Aye waambile mba kechi njipo naumo ne. Aye waambile mba, “Abyo ibyo, waikala na banabalume faivi.”

<sup>122</sup> Pano, talai, Bafaliseo byo bamumwene Aye wauba kyokya. Kiji bulongo, akya kyapusanako monka mukachi ka Kyambo, kika kyo baambilepo? Baambile mba, “Awe Muntu ke Zelebabuba, ulondolola bintu bikamweka kulutwe.” Mwamona?

<sup>123</sup> Kabiji Yesu waambile mba, “Yense ukamba kyokyo pa Mupashi Wazhila kimye kyo Akeya na kuuba kintu kimo, kechi kikalekelwa ne.” Ao ye wapusanako. Mwamona? Bino Aye waambile mba Ukebalekela mu kyokya kimye, mambo Mupashi Wazhila waji ukyangye kwiya ne; aye Kitapisho, Mwaanamukoko kechi wakifwile ne.

<sup>124</sup> Pakuuba awa mwanamukazhi aye kechi walangulukile kyokyo ne. Awa mwanamukazhi waambile mba, “Mwane, Nayuka namba Anweba mwi ngauzhi.” Abo kechi bajingapo na

ngauzhi pa myaka maaduleedi. Waambile mba, “Nayuka namba Anweba mwi ngauzhi. Bino, twayuka mba Mesiyasa, utelwa mba Kilishitu, byo Akeya, abyo byo Akoba.”

<sup>125</sup> Kyawama, inge abyo byo byo aubile Aye, nanchi Aye ujitu pamo keesha, ne leelo. Abyo Aye byo aubile pakuuba mba Ayemwine ayukanyikwe, nanchi kechi kijitu pamo ne buleelo nenyi? Wafwainwa kwikala! Bino, pano paji mwanamukazhi ne mwanamulume bakumana ne jikwabo. Aye kechi yeyewa mwanamukazhi ne, Amiwa kechi ne yewa Mwanamulume ne. Bino nangwa byonka byo Mupashi Wazhila umo uji pano, kabiji walayile amba mingilo yo Aubilepo, mba tukoba bintu bimo mu moba Mwaana muntu po akamweka.

<sup>126</sup> Bino, kwakubula kukuyuka (kabiji wayuka mba akyo kyakine), twibeenyi umo ne mukwabo, kabiji waimana pano. Kujipo bimo. . . Kujipo kintu kimo kyatama kwi obewa, kape kafwako, Amiwa kechi nayuka ne. Bino umvwe Nkambo Yesu usa kusolwela, konka ku Mupashi Wanji Wazhila, lukatazho lobe byoluji, usa kuketekela mba nanchi Iye Mwaana wakwa Lesa, kabiji kechi muntu nenyi? Akye ke kyavwetatu, *awe* tambanako awa—awa Lesa ye engijisha, uji yense Aye ye asalulula. Aye—Aye wikyuba akyo monka mwaikela lusa lwaji ne kusalulula. Nanchi, bino waketekela. Usa kuuba nyi? [Aye mwanamukazhi waamba mba, “Amena.”—Waku.]

<sup>127</sup> Baanga mujibumba basa kwikiketekela? Apano bonse babiji twaimana ku Kyeya, amba kechi twakikumanapo mu buno bumi ne, kechi jipo namilanguluko kana awe mwanamukazhi ye ng’anyi, byo anji, kwepi ko afuma, kyepi kyo abena kukeba. Amiwa kechi na kimumonapo mu bumi bwami ne, nobe byonka byo Nakibula mwanapo awa mwanamukazhi *popa* mu bumi bwami. Bino, monai, kino kyo Mbena kukeba anweba muube: mufumyemo awa wapusanako mwi anweba pano, ne kuketekela Kyambo umvwe Kyambo kya aluka ke muntu mukachi ketu. Akye Kyambo kya aluka ke kyumi mukachi kamibiji yetu, akyo kimweshwa Kyeenyi kya Lesa.

<sup>128</sup> Pano Aye ekiswishe kwikipana kwi aye. Aye ubena kukabila kintu kyaitabilwa. Aye kechi ujipo na mwaana ne, ubena kukeba mwaana. Uji peepi nobe myaka foote. Akyo kine kechi kyabula ku konsheka ne.

<sup>129</sup> Baikala ponka pano konse konse, banabakazhi bajinga bang’umba bumi bwabo bonse, kabiji bayiya ku pulatifomu byonka bye, kabiji Nkambo wibapa baana. Anweba bamo sutulai maboko enu mwayuka kikye. Mwamona? Mwamona? Natolele kamutemwe kasongwakazhi juba jikwabo, Pamulungu, byo Nafumine kuno, Pamulungu mute; amba bainaji bajinga ba ng’umba, aye Nkambo waambile. Kabiji awa songwakazhi wa mucheche, wajinga ka muntu kawama bingi, uji pano nyi? Uji peepi? Ee. Uji pano, ponkapo, waikala paapo. Bainaji baikala poop. Awe songwakazhi wa kamubiji kacheche, ayemwine.

Mwamumona nyi? Aye wajinga Kyambo kyaambiwa kyafuma kwi Lesa.

<sup>130</sup> Pano, anweba mwakonsha kumuketekela Aye na muchima wenu yense? Bushe waketekela mba aa mapesho omujinao, omubena kumvwa mwi anweba pa kino kimye, ke mukumbu wakwa Lesa nyi? Inge Lesa wakonsha kumbula jizhina jobe, pakuuba mba upane jizhina kumwaana, wakonsha kwitabila nyi? Nanchi, Mrs. Thompson, yanga kunzubo ne kwikala na mwaanobe, inge wakonsha kwikitabila na muchima obe yense.

<sup>131</sup> Bushe waketekela na muchima obe yense nyi? Ikalaitu na lwitabilo, kechi muzhinauke ne, ketekelaitu Lesa. Lesa ye Lesa.

<sup>132</sup> Muji byepi, mwane? Naketekela mba twibeenyi umo ne kwabo, ne apo. Kimye kyonka kyo Nakumonapo mubumi bwami, nobe byo Nayuka, po mwajikwiyanga kuno. Kabiji Najikulangulukanga amba yenu bamwisho yanji Mulongo Shakarian, nangwa ye bang'anyi... Mashagian, Mulongo Mashagian, awa nyimbi, byo wanjikwiyatu. Kabiji po Najikukumona kuya mu mulaini wa milombelo. Pano, byonji mweenyi kwi anweba, kabiji, nangwa kwi anweba, kabiji Amiwa ne mweenyi, mu musango uji yense. Pano, umvwe Nkambo Yesu usakwimubulapo kintu kimo amba anweba—amba anweba muji, kapapo kyo mubena kukeba, lekai twambetu kyokyo; kwimubuula kika, wambuula kyo mubena kukeba. Pano, Aye wikipana kala kwi anweba. Kibena kukebewatu ke lwitabilo lwabaya lwa kwikiketekela.

<sup>133</sup> Bino, baanga baumvwa kyokyo? Ke lwitabilo lwabaya lwa kuketekela mba mwatambula kyo mwaipuzha! Mwamona?

<sup>134</sup> Bino, bino, umvwe muji pano kukebapo kintu kimo, kabiji Aye wakonsha kumbuula ami kya kukabila kyenu byo kiji, pano anweba mwayuka mba Amiwa kechi nayuka kya kukabila kyenu ne, nanchi pafwainwa kwikalapo Kintu kimo kibena kwikyuba. Bino, mwayila Kyambo, Aye walayile kuba kyokyo. Aye wayukile milanguluko iji mu michima yabo. Abyo ibyo nyi? Kijitu bulongo.

<sup>135</sup> Muji nakukabila kwabaya bingi lwa kubukwa. Kintu kimo, obewa wamanyikwa na musango wa lubazhibazhi, lubazhibazhi lwabaya bingi. Abyo ibyo. Kintu kikwabo, muji na lukatazho lwa musana, kabiji awa musana wikala watama bingi pa kimye kyabayako, bakutumbwilepo na mambotu akikye. Abyo BYO BYAAMBA AYE NKAMBO. Akyo kine. Monai. Abyo ibyo. Kabiji kujipo nekintu kikwabo, kukabila kwenu kwabaya bingi, ke, ubena kukeba kutambula lubatizhilo lwa Mupashi. Abyo kine ibyo. Iyai kuno.

<sup>136</sup> Lesa mutemwe, mu Jizhina ja Yesu Kilishitu, awe mwanamulume ayuzhiwemo na Mupashi Wazhila, saka akyangye kufuma mukino kibanza, mu Jizhina ja Yesu. Amena.

Pano Kitambulai, mulongo wami. Ikalaitu na lwitabilo, kuzhinauka ne.

<sup>137</sup> Muji byeepei? Naketekela, monka Monayukila, amba twibeenyi umo ne mukwabo. Umvwe kiji bulongo, kika, pakuuba mba bantu bayuke, sutulaitu kuboko kwenu bayuke mba twibeenyi na beenyi. Amiwa kechi na mumonapo mubumi bwami ne, na kuyuka. Kabiji Naketekela ukyangye kumonapo, kana kyajingatu mujibumba. Mambo aye Taata wa Mwiulu wayuka, kabiji ne Kyambo Kyanji kiji pano, amba Amiwa kechi namonapo awe mwanamukazhi, mukuyuka, mu bumi bwami. Onkao mambo, Amiwa kechi nakonsha kuyuka kyo mwayishila kuno ne, kechi jipo nabuyuke kana yobe ng'anyi ne, kika, nangwa kimotu pe obewa ne. Amiwa kuuba nakubuulapo kintu kimo ne.

<sup>138</sup> Kintutu kimo, ke kyabupetu. Inge Nakonsha...Byonka byo mwajikung'umvwa nalondolola kakimye kapitapo. Endaitu kwiya, umvwai Aye kyo abena kwaamba; kyo Namona, Nakonsha kwikyamba. Aye kyoabula kwaaba, kechi Nakonsha kwikyamba ne. Nakonsha kwaamba kyokyo amiwamwine, kabiji kyakonsha kwikala kingi. Mwamona? Kyakonsha kwikala kingi. Bino umvwe Aye waamba, kine kiji bulongo. Kechi kyakonsheka ne, kikyangye kwikalapo kingi ne. Kechi kikekalapo kingi ne kikulutu Lesa. Mwamona? Mwamona, mambo Lesa kechi wakonsha kulubankanya ne.

<sup>139</sup> Bino inge Lesa wakonsha kumbula kyo ubena kukeba, kukabila kwenu byo kuji, nangwa—nangwa kyo mwananga kuno, kintu kyo mwauba, nangwa kintu kimo, kintu kiji byo byo, nangwa kana yenu bang'anyi, komwafuma, nangwa kyonse Aye kyo akeba kumbuula, mwakonsha uketekela nyi? Nakusachila.

<sup>140</sup> Kintu kimo, uji na lukatazho na kuulu kobe. Kuulu kobe kukukatazha bingi. Abyo ibyo. Sutulai kwenu...Uji nalukatazho lwa bainetu, kulubankana kwa banabakazhi. Kabiji uji na kukabila kukatampe bingi mu muchima obe, mambo watayapo muntu umo nangwa kintu kimo. Ke songwalume, kabiji songwalume obe wafumapo panzubo, wanyemapo, kabiji mubena kukeba amiwa amba ndombe abwele.

<sup>141</sup> Lesa uji Mwiulu, mutuminai mwanaji, kabiji ne lubuko. Lekai Mupashi Wazhila amwimike songwalume pajishinda bufuku buno, mubwezhai ku bainaji. Mu Jizhina ja Yesu. Amena.

<sup>142</sup> Aye Wayuka usa kumubwezha kwi obewa. Kusakamana ne. Ketekelai pano, kuzhinauka ne. Ikalaitu na lwitabilo, na muchima wenu yense. Mwaketekela, kabiji Lesa usa kuswisha byashala.

<sup>143</sup> Pano, anko koka kuyuka mipashi kusatu nangwa foolo, monse mo kyajinga, monai, Na—Nakuyatu poso meso ampofuka.

Amiwa kechi nakonsha kulondolola kyokyo ne, kechi kujipo jishinda ja kulondolwelamo ne. Anweba mwaamba mba, “Mwalanguluka mba, abyo byonka byakulengela kukatazhiwa kukila kusapwila ko wasapwila mamineti foote-faive nangwa kukilapo, byo mwalanguluka nyi?” Ee, mwane. Umvwe kyajinga ma awala asatu, kuuba kyaikala kyabaya byo bya ne.

<sup>144</sup> Mwanamukazhi wakwachile ku yakuvwala kya Nkambo Yesu. Kabiji abo bantu kechi babena kukwata ne. Kika, awe mwanamukazhi papo, talaitu kuno, aye wakonshatu. . . (Bikai kuboko kwenu pe amiwa. Mwamona?) Aye wajikukwatatu kuzhookoloka, kechi kyonsha kuubapo kintu kimo ne, Amiwa ne muntutu. Bino wafwainwatu kumukwata Aye. Kabiji Amiwa, kupichila mu kyabupe, ki—ki. . . kisendatu, bumuntu bwami bonse bufumamo, kabiji Ng’ambatu kyo Mona. Mwamona? Kabiji abyo byo byonka. Monai, kukwata amiwa kechi kilumbululapo kintu kimo ne, pakuuba ukwata Yesu kupichila mwamiwa. Abye ibyo awa mwanamukazhi byo kwachile Lesa kupichila mwi Yesu, byo Abuujile kuyuka lukatazho loajinga nalo. Aye wakwachile kya kuvwala Kyanji, wayile wakekala. Kabiji Aye waambile mba—kabiji Aye waambile mba, “Ing’anyi Wakwata?”

<sup>145</sup> Kabiji batumwa baambile mba, “Kika, bonsetu babena kukukwata Obewa. Kika kyo Ubena kwambila byo byo?”

Aye waambile mba, “Bino Naumvwa bulume bwafumamo mwi Amiwa.”

<sup>146</sup> Bino, mwayuka bulume byo buji? Ngovu. Aye waumvwine kukoka pa mwanamukazhitu umo Wamukwachile, kabiji Aye wajinga Mwaana wakwa Lesa. Pano ngaa miwa, ndengamambo, wapulukila ku lusa Lwanji? Mwayuka kyo yakijilamo nyi? Mambo Aye waambile mba, “Abye bintu Byonguba, ne anweba mukebyuba. Ne byavula kukila pabibye mukebyuba, mambo Ngya ku Ba Taata.” “Bikatampe,” Kyaamba ponkapo, bino kulumbulula kwawama kwa mu ki Giliki ke, “Ne byankila pabibye mukebyuba.”

<sup>147</sup> Pano, inetu kechi Namuyuka ne. Amiwa kafwapo kyo nayukapo pe aye ne. Aye ujitu mweenyi mwine mwine kwi ami byonka byajinga bantu bakwabo. Twibeenyi umo ne mukwabo. Pakuuba mba bantu bekiyuke, sutulaiko kuboko kwenu, ambayi mba, “twi beenyi.” Bino, Mwaana Lesa, inge Aye kimye kimo wakumenye mwanamukazhi nobe yuwe musango, ku mushima, kabiji Aye waambile nanji pa kakimye kachechetu, kabiji Aye wayukile lukatazho polwajinga, kabiji Aye wamubuujile lukatazho lwanji byo lwajinga. Kabiji wayukile pakyokya, amba awa wajinga Mesiyasa. Pano byo—byo Na. . . Obewa wakwata, Nakukwata, kabiji kafwapo kyamwekapo ne. Pakuuba umvwe lwitabilo lwami (kupichila mu kyabupe) nelwitabilo lobe (kupichila mukwikitabila) wakonsha kumukwata Aye, kabiji Aye wakonsha kwaamba kupichila mwi atweba. . . kupichila

mwiamiwa kwi obewa, nanchi wakonsha kuyuka mba Aye uji pano nobe byo Ajinga apa—apa pa mushima ku Saika. Mwamona? Aye ujitu pamo keesha, leelo, ne myaka yonse. Mwaketekela kyokyo nyi?

<sup>148</sup> Uji namakatazho avula bingi, bya kumanama byavula bingi, ne byalubankana! Kintu kikatampe kyo ubena kukeba mba bandombeleko ke kikola kyamashimba. Abyo ibyo. Abyo ibyo? Obewa ubena kukosakana namambo a kikola kyamashimba. Umvwe wamona wasutula mukoko obe . . .

<sup>149</sup> Kabiji wajikwendanga bitende bitende, kuvuluka kwami kwawama. Kape pembelaikotu kamineti, kape kintu kikwabo kyakonsheka kwambiwa kisa kusenda . . . Nangwa, mwayuka, mwaumvwa bintu; bantu, mwayukatu, nobe kumpema kubena Kwikikanya. Abo baamba mba, “Kika, aye wafwanyikizhetu pa kikye,” nangwa, mwayuka, nobe byonkabyo.

<sup>150</sup> Bino, ubena kumeka nobe muntu uji bingi bulongo, nyaamba ne amiwa pa kakimye kacheche. Twayai tukimaneko pacheche, mambo Nalanguluka mba mujipo kintu kimo mu muchima obe kyo ubena kukeba kufuma kwi Lesa. Bino, kechi Nakonsha kupana mukumbu ku milombelo yobe ne, bino Aye wakonsha ku- . . . Mambo, inge wikiketekela, nishi kya kumbulwa kala. Bino umvwe ubena kukebatu kwitabila; kunkulengela kwitabila. Pano, Nemubuula, ke kutazha ku mutemwe obe ao wabula kuno, kabiji ao ke mulongo wanji, kabiji ao mulongo kechi uji mukino kyaalo ne. Aye uji nobe mu kyaalo kya meema, muji bingi bizhiba bikatampe. Nakonsha kwaamba mba kuji nobe ku Michigan nangwa kuntu . . . Ee, Michigan koko aji. Kabiji aye ubena kumanyikwa na kintu kipayang’ana, kabiji akyo ke lufyo ubula kubukwa ye umukatazha. Abyo ibyo, kechi ibyo nenyi? Abyo BYO BYAAMBA AYE NKAMBO. Bino, katambala kamilombelo ko ujinako mumaboko obe, koowaji kusutula kwi Lesa, tuma koko kwi mulongo obe ne kumubuula mba kechi ekale na luzhinauko ne, kana kwitabila, kabiji abyo byo byonka, usakutambula lubuko ponka pano inge wakonsha kwitabila.

<sup>151</sup> Waketekela na muchima obe yense nyi? Monai, nanchi, inge waketekela, pajitu kintu kimo kyakuuba, ke, kwikitabila. Abyo ibyo nyi?

<sup>152</sup> Pano anweba mwaamba mba, “Aye ubena kutala pa kyokyo, abo bantu. Abyo byo abena kuuba, kutala pe abo.” Mwikimweshatu bulongo!

<sup>153</sup> Pakuuba anweba byo mwabula kuyuka kikye. . . Awe inetu papo, inshila kukwe, inetu, kukwe, mulwazhi, nangwatu yobe ng’anyi. Amiwa kechi mbena kutala peaye ne. Mwaketekela mba Lesa wakonsha kumbula lukatazho lweni nyi? Sutulaiko maboko enu, inge mwauba, awe inetu papo, awe inetu papo, mulwazhi. Ee. Ee. Kijitu bulongo, nanchi umvwe mwaitaba kyokyo na muchima wenu yense, lukatazho lwa kunshika kyanji

kechi kikatwajijila na kwimukatazha ne. Kijitu bulongo, yanga kunzubo na kwikiketekela! . . . ? . . .

154 Kechi najikumutala ne, naji Kwikyuba nyi? Monai, Aye . . . Watala *mujije* jishinda, kimwesho pokiji nangwatu kikale byepi. Amena! Kuuba mwikimona nenyi? Kyalumbulukatu byonka Lesa byo alumbuluka!

155 Mwikiketekela, ne akyo? kikola kyakunshika kyanji kyakonsha kumpwa, ne akyo, kuuba kyaubiwa ne nyi? Mwaketekela mba kyakonsheka nyi? Kijitu bulongo, yanga ukabuule Nkambo Yesu amba anweba—anweba Mwamuketekela.

156 Juba jimo mukakebanga kusenda ka—kakoto inge akya kikola kyamashimba kya kumanyika, bino kechi kikobiwa ne. Anweba kechi mwikyuba ne, kechi mwaitabila mba byokiji ne, mwaitabila? Mwaketekela mba musakwikalatu bulongo nyi? Yanga mujishinda jobe, kabiji Yesu Kilishitu wakubuka.

157 Kikola kyamuchima kipaya bantu, bino kechi kyafwainwa kukwipaya ne. Mwaketekela mba Lesa usakwimubuka, kabiji ne kwimulenga kwikala batuntulu nyi? Yanga saawikitabila na muchima obe yense, ne kwaamba mba, “Amiwa kine ne kiketekela.”

158 Anweba mwamba Kizungu? Anweba mumvwa Kizungu nyi? (Muntu umo wayiya.) Ee, kijitu bulongo. Musakumubuula Amiwa byo sakwambanga kwi aye? Mubuulai kana usakwitabila, lukatazho lwa munda lusakupwa. Aye—aye usakwiketekela nyi? Lukatazho lobe lwa musana lusakupwa, ne alo, nanchi pano yanga kabiji usakubukwa.

Muji byepi? Mwaketekela nyi?

159 Awa mwanamulume wayikala kookwa na lukatazho lwamusana, wajinkutalanga kimye kyo Najikwamba kyokyo. Aye wakonsha kubukwa, ne aye, inge wakonsha kwikitabila, mwane. Kijitu bulongo, mwane.

160 Awa inetu wayikala kwiipi ne obewa kooko, uji na lukatazho lwa shingo, kechi uji nayo nenyi, inetu? Mwaketekela mba Lesa usakwimubuka nyi? Mubena kukeba kubika maboko pa kasongwalume namambo amanungo anji, kabiji usakwikalatu bulongo, ne aye. Wikiketekela akyoniyi? Wajinga nalukatazho lwa banabakazhi, lukatazho lwa bainetu, kechi uji nalo pano ne. Lwitabilo lobe lwakubuka kabiji lwakulenga kwikala mutuntulu.


161 Mwamuketekela Yesu Kilishitu, amba ujitu pamo keesha, leelo, ne myaka yonse? Nanchi twayai tubike maboko etu pa umo ne mukwabo kabiji ne kulomba uno mulombelo wa lwitabilo, yense mwiatweba, lombai lulombelo lwa lwitabilo.

162 Lesa Mutemwe, mu kimye kyo twamvwetwa na Kyeenyi Kyenu kya Bulesa, kwimumona Anweba saka mubena kwnda



mujibumba, na kubuka bakolwa konse konse. Anweba mwi Lesa. Nalomba mba Anweba musakubuka aje jonse jibumba. Lekai Muya wa Lesa ebaponene kipyakipya mu michima yabo, kabiji mwibayukishe amba kimye kibena kuya nakupwa. Tujitu na kimye kicheche kya kwikala pano, apo potukekala ne Anweba Ye twatemwa. Kabiji Kyeenyi Kyanji kilete lubuko ku uji yense.

<sup>163</sup> Twazhachisha Satana, twazhachisha byubilo byanji byonse. Mu Jizhina ja Yesu Kilishitu, Satana, fumamo mu bantu.

<sup>164</sup> Bonse bakonsha kumwitabila Aye pano, ne kutambula lubuko lwenu, imanayiko, ambayi mba, “pano Naimana mukutambula lubuko lwami. Amiwa nekiketekela.” Nangwa musango wa lukatazho lobe lwikale lwa musango ka, inge kine wakonsha kwikitabila, imanako. Pano sutulaiko maboko enu, ne kwaamba mba, “Nemusachila, Nkambo Yesu, pakumbuka miwa.” Lesa ekale ne anweba. Amena. 

*LUKUNWA WA PUSANKO* KDE65-0118  
(The Seed Of Discrepancy)

Ino Mbila na Mulongo William Marrion Branham, yalupwilwe patanshi mu Kizungu pa Pakimo mabaanga, Kakubokache 18, 1965, kuba Full Gospel Business Men's Fellowship International kwajinga pa Westward Ho Otela ku Phoenix, Arizona, U.S.A., byafumishiwa pa tepu ukwata ne kufyatula kabiji bya nembwa mu Kizungu kwa kubulwa kupimpulwa. Ino ntuntulwilo muki Kaonde ya nembelwe ne kusampanya na ba Voice Of God Recordings.

KAONDE

©2020 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubeshu, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)